



間齋稿

桂  
塤  
題







Digitized by the Internet Archive  
in 2010 with funding from  
York University Libraries






余少孤陋未嘗學問中歲仕宦奔走黽暇晚邁世變輒多感觸倉  
皇避地憔悴行吟所作詩文詒癡符耳了因諸君索取付印重違  
其意明知覆瓿大雅所笑顧平生心迹略可攷見若碑傳誌狀朋  
輩敦迫亦勉爲之其人多可傳者蔡愧韓諛免貽誚責他日志乘  
或有取焉詩詞自寫牢愁類皆悽苦之音亦不暇計工拙也識者  
諒之戊子八月閩道人自識



闇公世丈辛亥後遯迹海濱先後十餘年屏絕人事以闇齋顏其室每言予遺之民不當以文采自炫間有所作未嘗出以示人顧其遭際亂離倉皇遷徙牢愁自寫不能無所寄託傷時感事紙墨遂多又嘗與吳澹庵丁潛客陳真逸諸公遊迭相酬唱諸公前卒傳狀之作責無可辭晚歲惟汪慵叟過從最密慵叟輯碑傳續集於所作悉數采錄未及付梓終恐散佚弟子黃君了因等以印行為請闇公遜謝而了因索之益堅且與高圓悟董仲偉董鶴年胡太初諸君鳩貲促其付印闇公重違其意遂檢篋中存稿屬景會編次引丁敬禮定吾文爲比愧不敢承謹從事校讐之役而已詩云風雨如晦雞鳴不已毛序謂亂世思君子不改其度焉世變日亟滄海橫流舉國競趨於權利之途而諸君獨惓念師門更欲壽以文字殆所謂亂世不改其度者歟編印畢事特述其緣起以告後賢未敢云商量舊學也戊子仲秋南海廖景曾識







闇齋文稿

番禺張學華

毛定直公奏議序

同治元年歷城毛定直公鴻賓總制吾粵時先大夫佐公幕府司章奏是歲學華始生稍長卽識公名忽忽四十餘年矣公子稚雲觀察舉光緒戊子鄉薦與學華有齊年之誼比來濟南因得訂交過從話舊出公奏議若干卷見示學華譴陋何足以知公顧嘗讀中興名臣奏議於公奏陳湖南募勇之弊及緩裁釐金兩疏竊歎其選將以治兵而不徇時俗之見理財以濟用而不持矯激之論老成謀國用心良苦今所刊奏議數百篇自軍興以來規畫遠大至其慮事之詳知人之哲往往事後而益見當是時洪楊構亂擾攘十餘年蹂躪半天下雖以曾胡之賢運籌於帷幄多鮑之勇効命於疆場而一時封疆大臣苟非有洞達時勢深明治體者同心

戮力左右其間則其難未易平也公雖未歷行間而功已偉矣咸同至今垂五十年世運之遷流人才之升降盱衡俯仰殆不忍言而兵力淺弱財用益匱遂爲吾國之大患聰明才智之士挾其一得銳欲有所表見以更張庶政士大夫希聲附和靡然從風而反是則又欲閉關自守一切因循處強敵爭雄之世而苟安於無事非所以爲國家謀治安也安得如公者因時而損益之折衷於至當以通其變而濟其窮庶幾補救萬一乎讀公奏議不禁畢然而望也公督粵之明年以微眚去官未竟其用其所建白具於茲編至於立朝風節居官勲業備詳史乘不復贅焉

鄧和簡公奏議序

順德鄧和簡公奏議公子用甫觀察毓生太守所編曰諫垣奏議曰撫皖奏議曰撫黔奏議凡若干卷方景廟初元臺諫爭言事彈劾權貴號爲清流朝廷優詔褒納而王祭酒先謙已有預防流



弊之奏謂言路不可不開亦不宜太雜蓋驚於時名隨聲以相附和者往往而有也疏上朝論譁然李尙書端棻時官御史嚴劾祭酒莠言亂政請治其罪詔兩解之恐開攻訐之漸慮至遠也

東華錄  
光緒

<sup>九</sup>和簡公官諫垣時未嘗過露鋒棱其所條奏大旨以安民緝盜爲先而尤急於裕民食則根本之計庶幾乎仁言利溥者矣洎出守巖疆洊擢開府值甲午庚子之後國威新挫朝野上下倡言變政風氣所趨或乃粉飾張皇不惜爲夸大之詞以炫觀聽取快於一時之議論而禍患中於隱微不暇計也公獨持以鎮靜以爲疆臣之責莫先察吏深念夫民生之疾苦於賑荒一事蓋兢兢焉至於興學堂修武備凡所以圖自強者擘畫罔不詳慎得其人而措之咸宜也大臣謀國若畏若訥爲政豈在多言哉旣引疾歸里十餘年時事日棘其流極至於不可收拾向之侈言變法者身名多敗裂惟公從容壽考不渝其素蓋貞固自守乃能始終如一豈隨

風氣爲轉移者耶公任臺垣二年任封疆且十年奏議今不盡存茲編皆手自屬草不假幕僚黨而觀之則知其拳拳於愛民者卽所以保國其義可深長思也

溫文節公奏議序

嗚呼國家興亡之故豈不由人事哉余讀溫文節公奏議不知涕泗之何從也曩官京師猶及承平歲甲午 景皇帝初親政勵精圖治大考翰詹以次召對溫諭勸勉仰企乾隆朝古文之盛庸詎知隱患已伏朝鮮構亂猝發而不能收拾朝士闇於外勢一意用兵國威旣挫爭言變法戊戌庚子一誤再誤西狩而還日益勢亂然自辛丑逮辛亥歲星一週其時海內暫安無事倘使急起維持執政大臣有如曾文正胡文忠其人上下一心力籌振作或重見中興之治卽不能而循常蹈故猶未遽致淪胥至於此極也顧以喪亂之餘亟行新法旣爲衆論所劫持而又遷就依違驚其名而



亡其實歐風東漸倡言革命勢岌岌不可終日當事者不之省猶以粉飾張皇爲尙至親貴用事尤失衆望三百年宗社隳於一旦可痛也夫甲午一役袁世凱駐節東藩實爲禍首既不加譴責復任以治兵養成羽翼始裁制之陳松山給諫嘗語余同臺聯摺劾袁先謁南皮相國松山大言曰項城蛇蝎也南皮猶謂其善外交彈章上解職放歸內外重臣多其死黨盤踞如故武昌發難遂起用之監國避位歸藩盈廷唯諾文節抗言袁世凱首先署名語含斧鉞而袁已內握政權外倚兵力陽與皇室周旋陰與叛徒勾結其勢不可復制雖有言者柰之何哉文節居諫垣二年章數十上其論新政一疏洋洋萬言痛砭時弊賈生流涕宣公論事不是過也其言亂黨附入新軍爲腹心之患鄂亂蔓延有肘腋之憂則先幾之識也其請懲治鄂省逃官定剿匪之策則救急之計也危急存亡之交所言皆關大計非止於樞臣疆吏彈劾無所避也泣血

椎心披肝懸胆以求補救於萬一百世而下猶爲悚動而當軸諸臣以斗筭之才膺鈞衡之寄言諄而聽藐慮淺而智昏及夫亂軍紛起事機已急猶是晏然處之坐視淪亡別謀擁戴其罪浮於叛逆萬死不足蔽辜也凶德參會甯得委諸氣數乎文節誠不負言職後人論者則太息痛恨於無窮矣余諫院舊僚初到官上書言事承命直政垣于侍郎式枚謂曰君今居政地不復以言爲職矣喻年改外鞅掌簿書碌碌無所建白滄桑留命洪忍偷生循覽斯編積憤填胸於身世有餘恫已

勝朝粵東遺民錄序

往讀全謝山鮚埼亭集明季逸民甬上最盛當南都旣覆浙江屬郡相繼降附徧甯波未下錢忠介倡議抗守諸君子投袂並起及勢窮力竭相與結爲湖上吟社日抱麥秀黍離之感以終其身全氏生同里閉流風未遠凡所稱述得之故老傳聞者爲多故其表

章易爲力也吾粵當桂王時陳文忠陳忠愍共舉義師張文烈起  
兵東莞遠近響應海濱義民如王興鄧耀陳奇策等所在擁兵咸  
奉號令遙爲聲援三公旣殉國難文忠之弟子升文烈之第家珍  
尙保餘衆力謀恢復廣州再破抗節不變獨漉以復壁之孤遷徙  
流離屢瀕於死顧其觀變待時無一日忘故國也忠義之氣萃於  
一門經百折而不撓而聞風興起以名節相砥礪者非其門生卽  
其故舊其他孤臣節士同謀舉事者讀東莞張氏三疏其人不可  
悉數事敗以後多能保其晚節又或草茅韋布未嘗有一命於朝  
而潔身高蹈誓死不屈者比比也爰及方外函可函昱早歲出家  
獨能表揚節義宏暢宗風則宋之杲公同時之南嶽大師也從來  
忠孝大節自二三賢者倡導之後遂成爲風會此非其效數明季  
距今二百餘年桑海之交文字散佚稽諸志乘或缺而不載或載  
而不詳至於私家著述流傳日少士之懷負殊異湮沒而不彰者



多矣九龍真逸慨然以編輯自任乃蒐集郡縣各志及國朝諸老詩文遺集旁加攷證凡得二百九十餘人成勝朝粵東遺民錄四卷然後知粵人氣節之盛尤非甬上一隅可比若其纂述之勤則過於全氏也昔黃太冲謂宋二王立國三年文陸陳謝而外豈無人物今無一傳以爲遺憾篁墩程氏撰宋遺民錄朱錫鬯謂其所收不及什一吉光片羽人猶珍之茲編所錄掇拾於殘編斷簡之餘凡一人一事散見於諸家集中必爲之詳究其本末於以永鄉邦文獻之傳抑一代之魂行奇節其顯晦固有時也夫古人往矣彼其惓懷君國耿耿未已方蹙然引爲內疚豈復計百世以下有人焉表而章之然而天理民彝終占不絕則此潛德幽光之發猶有所興感非細故也嗟乎自新學盛行奸險之徒不惜破壞名教倡爲異說以便其私而奔走於衣食者又往往不能自固所守嚴穴之士無可共語徒欲求之古人以寫其抑鬱不平之恨使後之



讀者知名教之不容破壞而又懼空言之終無補也李杲堂之言曰采薇硜硜猶爲末節然則此編之成其隱痛爲何如也

### 元遺民詩序

張君豫泉旣刻其所著明千遺民詩復蒐采元代遺民凡得三百五十餘人爲詩若干首將以付刊郵寄索序嘗考有元一代以蒙古入主中國中葉而後權倖用事盜賊蠭起蹂躪徧於各行省然皆饑民窮困挺而走險志在剽掠攫利而已未聞有倡爲異說姦人柄國陰相附和以成其篡奪之謀悍然而不顧者趨時之士覲然異代猶復巧詞文飾甚且反顏醜詆世道人心敗壞極矣昔元帝大去仍主故土一時耆獻如鐵崖清閼九靈席帽諸君子皆能貞介自守潔身高蹈雖以明主之雄猜亦不爲屈獨非中原之士耶豫泉自辛亥後屏迹滬上日唯以著述爲事思古傷今感懷身世此二十年中禍亂侵尋元黃變色茫茫天壤以迄於今欲求

如蔡子英之追隨故主而不可得何其悲也於是闡發幽潛表章忠義積其牢落不平之氣託爲詩歌將質諸百世以俟公論大明之日此其作詩之微意也歟嗟乎逸民首夷齊而申之曰不降不辱以周武之仁商紂之暴猶慄然於君臣之不可易采薇之歌千古解之蓋遺民也者必惓惓君國之思具富貴不能淫貧賤不能移威武不能屈之操非易代之際浮湛閭里者皆可進於逸民之列也豫泉甄采不苟至其詩不名一體或慷慨激昂或低徊婉轉使讀者感歎於不能自己固無俟余之贅言也

余忠襄公年譜序

讀表名臣張文獻公余忠襄公同爲韶人三百年間挺生兩傑明邱文莊公於館閣羣書中得兩公遺集錄出付梓其序襄公武溪集云韶郡二水夾城流自瀧來者曰武溪瀨水自庾嶺下與武水合是爲曲江張公以曲江名集余公集名以武溪蓋有意匹之歟

顧襄公別有奏議不入集中見宋史久佚近人蒐集得若干篇足資攷證至其立朝風節居官勲業具詳國史惟未有輯成年譜者公裔孫國屏乃爲詳稽傳記並取奏議之有關政要者分年詳述咸著於篇意至善也綜公一生爲諫臣爲經略使契丹平儂蠻定交趾政事文學使才將略備於一身值仁宗御宇自天聖至嘉祐四十二年爲宋代極盛之世納諫則直言無忌用人則信任不疑公於其間用能敷陳剴切樹立宏遠恩禮始終弗替讀曲江感遇諸篇憂讒畏譏時勢又不同矣論其世知其人百世而下猶得想見其風采也譜成出示並屬爲序詩曰高山仰止景行行止服嶺以南誰不知景仰公者寧待贅詞廼爲攷其遭遇之際而知聖主賢臣之相得益彰千載一時非偶然也公里有風采樓與風度樓對峙昔楊萬里言張余二公相望揭日月引星辰豈虛語哉遂不辭而爲之序



北郭草堂文集序

吾粵經學大師百年來咸推東塾先生及其門者各能以所學顯於時而南海廖先生則羣奉爲都講薪火相傳如白沙之有甘泉也先生初至都南皮張文襄公卽以顏子目之通籍後官詞垣時清流滿朝列先生無所干謁亦不輕爲結納甫踰歲翩然歸里竟不復出平日篤守師訓徧覽羣籍精研三禮著禮表十卷少時於音韻之學如有神悟爲東塾所奇賞後益博攷諸家辨其訛誤又有羣經古今文家法考一卷乾嘉盛時號稱經儒者莫能過也先生深藏若虛不欲出而炫世海內名流未嘗一通聲氣蓋恥以名譽相高光緒中葉而後士習漸囂負才之士矜奇立異先生泊然自守而已間作詩文非所措意遺稿未及手定伯魯世兄掇拾叢殘鈔存若干卷頻年喪亂兢兢保守近者將付剞劂以學華夙侍几席屬爲一言竊維時至今日倒懸已亟與言經術文章方且羣



笑爲迂然斯文未喪貞元絕續之交他日必有起而張之者烏可付諸消沈也先生晚觀世變愀然憂之嘗欲著安攘錄哀輯累朝中外交涉事凡見於史傳者分門采錄考其得失彙爲一編東塾述師說謂辦洋務無成案此可爲成案矣削稿未就論者惜之顧先生不幸而薈於年平生著述多未成書以爲遺憾猶幸得從容講席目不覩陸沈之禍日輾轉於水深火熱而淪胥以盡也昔白沙不輕於著述甘泉遺書數百卷今傳者寥寥先生肩嶺學之傳不在著書之多而品詣卓絕無愧古人讀其文益慕其人汪汪千頃之波不當於文字求之而文字足以傳矣

丁潛客遺文序

潛客前輩忠孝大節師表人倫晚遭滄桑貞介絕俗當時或憚其丰裁之峻歿後十餘年鄉人士景慕遺風稱道弗衰翕然奉爲儒宗詩文其緒餘耳往余與汪慵叟輯其遺詩一卷已刊行文不多

見唯君早直承明封章屢上皆報留中洎主講席勤於訓士又爲  
桑梓籌保衛未遑著作辛亥後隱居奉母定省之暇輒手一編枕  
靡於經史百家而以餘力爲文然不輕爲酬應之作故流傳絕少  
平生學宗程朱嚴於自省日必有記讀書有得鈞元纂要並所作  
文雜錄其中往往削稿已成未及寫定君甥沈君建侯收拾叢殘  
得文若干首彙鈔成帙雖散佚尙多彌足貴也君多論古之文史  
遷所謂好學深思心知其意昌黎所謂作爲文章其書滿家者耶  
余幸交君校訂遺編後死之責回溯往昔從容談藝不可復得而  
世變遷流同時儕輩相繼凋謝余以漂泊之身自傷孤孑每念君  
不屈不撓之精神讀其文如見其人曠世猶相感也建侯從君受  
學不忘渭陽之誼能於故紙堆中蒐集遺文可謂賢矣承屬爲序  
爰綴數言以詠來者知君不以文傳而文亦不朽已

明史樂府序

樂府起於漢魏作者迭興沿及後代古音浸失顧其卽事抒情思古以諷今知人而論世於遭逢喪亂之餘借以寫其身世之感則三百篇比興之旨也辛壬之交澹庵前輩屏迹里門嘗與丁潛客侍讀撫取明史中事迹拈題分詠成樂府若干首凡可歌可泣可驚可愕之事一託之吟諷以上下其議論使讀者流連往復感歎於不能已有明三百年來創守之規盛衰之勢政治之得失人物之臧否皆得藉以攷鏡蓋詩卽史也夫一代興亡其來有漸盱衡今古非必盡出於一途而陰陽消長之機理亂循環之數一事之微而全局係焉往往浸淫潰決至於不可收拾然後敗亡隨之覆轍相尋至今爲梗不獨爲明哀也顧其旨深其詞婉一唱三歎極於紆徐委曲而不爲嘲啁噍殺之音於春秋褒貶之中寓詩人敦厚之意此又其涵養深純者已澹庵能文章謹嚴似柳州遒勁似半山顧未肯出以問世又輯廣東文徵百餘卷吾粵文獻之淵海



也卷帙繁重僅能寫定今將以所著明史樂府付印余尤望其次  
第刊行以公諸世也

瓜廬詩牘序

陳文良公瓜廬詩牘二卷哲嗣公眉世兄將以付印而屬爲之序  
公平生大節不必以詩傳晚年著述亦不欲以詩傳顧其出處蹤  
跡略可攷見當夫入直承明出膺使命輶軒所歷兩入滇黔一登  
泰岱憑眺山川流連弔古皆以助其摠寫泊車駕西巡麻鞋奔問  
涉華嶽渡河洛足跡半天下情來興往紙墨遂多此一時也甲午  
庚子而後海波湧洞朝局蝸蟬杜陵憂亂之篇香山感時之作俯  
仰太息情見乎詞及視學金陵數政之餘吟事不廢而積薪厝火  
隱患已深九飄憂時五噫去國此又一時也辛亥以還桑海旣易  
宮甯避地焦先結廬棲遲寂寞之鄉問訊漁樵之侶時與二三故  
舊登宋王之臺訪楊侯之廟野哭畝歔谷音忼慨嘗擊竹而碎石

或呵壁而問天此又一時也嗟乎春明回首陵谷驚心祇此數十年間世運之遷流人事之變幻皆得於公詩見之如讀夢華之錄陳迹都非若譜冬青之吟悲涼欲絕綜公一生燭先幾則爲長沙之痛哭堅晚節則爲表聖之歸休忠愛纏綿蒼茫感喟豈唯導揚風雅模擬騷辯而已耶公嘗語余早歲學詩得東塾先生指授始解詩法東塾少好爲詩晚而棄去公隱居後注孝經以諷世錄遺民而見志凡所撰著咸具微愔詩亦其緒餘耳不辭譴陋輒爲嚶引世之讀公詩者當不能無風雨如晦鷄鳴不已之感也

微尚齋禱文序

微尚齋禱文六卷汪君憬吾自定稿哲嗣等將以付梓書來問序余瞿然曰君嘗以相屬也曩君出視此編屬爲之校訂自言中多憤世之談恐遭時忌不敢求序於人夙託相知欲得數行弁首略述其生平足矣余因循未報君遽長逝以爲愧負今讀其文而重

有感也君少從東塾先生學講論經史旁及詞章生際承平初不欲以文傳也中歲而後所學未得一試時局迭變異說紛紜驚新而厭故炫名而亡實禍患伏於隱微而莫之省也君以憂時之遠識爲救國之危言感慨歎其中有所不能自己者嘗恐學術之害中於人心辭而闢之故不嫌於過激晚遭喪亂舉世波靡獨不爲時風衆勢所劫表章忠義闡發幽潛隱以寄其孤抱君不以能文自詡而一生志節於文字見之往日從容談藝誠不料數十年後徒以空言寫其身世之感也今者遷流日下淪胥之禍已見莫不服其先幾之識至於公論大明之日其人其文益爲世重已集中有古文有駢文有考據之文東塾嘗謂兼擅此數者海內名公惟顧亭林洪稚存袁簡齋阮文達能之君諸體無所不能足以方駕前賢使東塾可作其驚喜可知余獨感於所謂憤世者文章之道與時勢相推移有不期而然者俯仰愴歎而爲之序亦以副君之



意也

羅浮游記序

羅浮仙境自晉葛稚川後棲隱之士咸目爲洞天福地其作爲圖志者最先有宋王冑明陳璉因之成羅浮志十五卷吾友肅公道長續爲增補比昔加詳唯歷代遊記流傳不尠陳志未能備載也圓鏡道侶爲酥醪觀都管去年六上羅浮修分霞嶺路種梅花千本近者搜求舊籍自宋迄明清昔人所爲遊記凡若干種出以見示且語余曰羅浮以飛雲頂爲最高處多遊屐所未到往鄒師正指掌圖贊由寶積寺後之二石樓層累而登當時謂之雲路今已斷人行宋趙汝馭則自石洞開路而上明劉克平則自金砂寺上清潘耒則自華首臺上又明歐大任李孫宸皆曾登飛雲頂攀陟險阻所歷之境又不盡同並詳所作遊記趙記見陳璉志歐李劉潘諸記世不多見皆搜得之上下千數百年仙山靈蹟不可勝紀

而徑路之變遷祠宇之建置或昔險而今夷或昔存而今毀賴此互相攷證其有裨於掌故固多抑可爲遊者之先導焉此外如祝枝山李青霞歐子建陳獨漉諸先生其著作尤可寶貴清嘉慶間惲子居謝里甫諸公每住羅浮流連經月酬唱之作傳世甚夥里甫先生日記尤詳於敘述皆志羅浮者所必收今將先以付印而續有事於纂輯他日得成巨帙或足爲名山增重也子爲我序之余曰君之意善矣余以衰病之軀不克爲茲山之遊將四十年讀茲編既有愧於君而益爲之神往惜未能策杖登飛雲之巔與諸先生所言相印證也遂書以歸之

繡詩樓詩二集序

昔人論詩漁洋獨擅神韻倉山專取性靈二公皆生際承平遭遇極盛故其爲詩也雍容揄揚風流跌宕渢渢乎一代之正聲已近世作者激昂時事輒爲發揚蹈厲之詞或作恢詭奇崛之語變風

變雅時代爲之有識者慨焉其他流連風月刻畫山川藻繪蟲魚  
雕鐫草木則又藝苑之叢談騷人之小技云耳饒平陳君子丹以  
繡詩樓名其集嘗作水災救命詞三十首纏綿悱惻感動一時女  
士繡之得重價以助賑仁言利溥海內稱之以是其名益著初集  
刻於己酉風行已久今復緝辛亥以前所作編爲二集其詩不名  
一體往往自寫性靈獨饒神韻使與漁洋倉山並時其必引爲同  
調可知也余以辛卯遊潮未及知君泊今二十餘年甫遇於香江  
得讀君詩時局滄桑愴懷身世余識君恨晚而猶幸斯文絕續之  
交尙得留風雅一綫之傳爲可喜也他日庾信哀時之作遺山感  
事之篇必有悲涼激壯發於情之不能已者以余頽廢恐不堪卒  
讀也君睠懷故舊刻有四先生詩存許先生介珊余受業師也因  
君之薦於師門而知詩人之詩本原於忠厚者其真摯尤不可及  
余爲表而出之嗚呼可以風薄俗矣



文貞公年譜跋

六世伯祖文貞公年譜同里丁君傳靖所纂嘗攷家乘及公文集互相參證尙多缺略復從史館鈔得傳稿與丁君所引互異蓋坊刻通行本有國朝漢名臣傳謂從史館鈔出實則非史館定稿李次青先正事略據此書爲底本其中舛誤尤甚者如康熙四十年公起復入閣據文集謝恩疏最爲詳確名臣傳誤爲三十九年先正事略遂謂服未闋奉召入閣辦事此出處大節不可不辨者也公兄禮存公歿後三年公假歸侍養至甲寅滇逆作亂還京據家乘補入官禮部時議罷封禪在滇南底定台灣歸順之後適值上元甲子據公集定爲是年事集中疏議各篇考東華錄分年纂入具有確證可備掌故同時先後在閣諸公皆理學名臣見熙朝宰輔錄並分注於下當日明良喜起之盛迄今二百餘年猶可想見雖漢之文景唐之貞觀且弗逮焉嗚呼豈非千載一時者歟公

一生事蹟得丁君年鉤月纂體要已具謹爲補其罅漏而述其大凡於此俯仰今昔蓋不勝世變之感矣

石帆詩集跋

族祖石帆先生爲十一世伯祖則之公會孫 則之公祖 修羽公父 叔鳴公皆以博雅稱於時值明季祖孫三代並守遺民之節 石帆先生繼起布衣工詩與同里余江干鮑步江兩先生稱爲京口三詩人沈歸愚尙書序其詩集謂則之公天爵自尊潔身獨善所爲詩希風陶令一寫其放懷自得之趣石帆不慕榮祿與則之公同蟬蛻穢濁與則之公同其淵源有自來矣 則之公詩今傳者寥寥石帆集舊有刻本皆三十以前所作板亦久燬祇焦山書藏尙存一部高葵北前輩鮑蛻農太守爲向山僧借鈔郵寄來粵同年趙聘三森甫昆仲藏有棠湖遊草爲 先生集外詩同邑柳君以鈔本見示又得李君樹人及蛻農太守之哲嗣殿卿互

爲校訂亟付剞劂用廣流傳亦以副諸君子表章先哲之心云爾

附京江張氏家集例言

一家集之名始見呂向文選注唐有廖氏家集見宋史書已無

傳宋有三劉家集劉義仲其裔孫元亨所緝同時唱和之作

及他人之文有關者附入焉近者九江朱氏傳芳集體例略同

劉氏茲集竊比前賢弗嫌蹈襲專緝京江張氏詩文爲正集附

錄先代碑傳名公贈著爲外集康熙時文貞公遭際 聖明屢

邀 宸翰敬謹登載冠於卷首永誌 恩榮

一我家自元末遷居丹徒仲敬公以忠節著紹南公以孝義稱明

季時 修羽公父子祖孫並守遺民之節尤以風雅著聞逮本

朝順治開科 湘曉公冠冕南國時推文章宗匠 文貞公集

列於四庫泚泚乎盛世之音至圖東公 石帆公皆一代詩人

作者迭興風流不墮逮於閨秀亦爛吟詠茲集重在繼述藉傳



世學非炫虛聲

一詩文派別晚近始分循流溯源本無不合朱氏傳芳集詩文各以類從詩分古今體至駢散文獨宗蕭選謂其渾合不分於義爲古茲集悉沿其例其程試之文國初時京江制義膾炙人口美不勝收乾嘉以後房卷流傳又多散失今槩不采入從通例也

一應制詩賦前人尠以入集然如盧肇海潮何諷夢渴僅傳一賦欽定全唐詩亦有止登試帖一首以存其人者近如樊榭文集冠以律賦湖海詩傳兼收試帖藝林流播初非叔例吾族咸豐朝後文貞公殉難浙江

從兄星白先生諱錫庚以刑部侍郎在浙江學政任內殉難予諡文貞公人稱後文貞公

生平奏牘及

詩古文遂無一傳祇有館課詩賦數首茲並采錄非唯風雅之傳亦見名德之盛

一先集存目約數十種今傳者寥寥茲集網羅散佚全集具在者

不克備錄其有關典要或足補舊聞者登之至於吉光片羽零落僅存間從京江耆舊集京口三山志中掇拾一二發名山之藏則斷簡足珍搜滄海之遺則寸珠亦貴矧在先澤敢忘數典凡可甄尋悉爲著錄

一康樂之述祖德平原之誦先芬固藉文字而傳尤以忠孝爲本京江族望甲於江左國史所載邑乘所紀文章事業允示來茲其或孝弟稱於家庭節義著於閭閻不有撰述曷表清徽茲集凡碑銘傳誌以次編輯列於外集雖曰載之副墨終期同照汗青

一詩文投贈昔人所重太冲乞皇甫序言仲宣爲荊州作記傳之奕葉相得彌彰若夫河梁贈荅松陵唱和同聲之應風行益遠往者家乘本有藝文一門搜羅略備茲更增緝補其缺遺昭代名流於焉薈萃雖云一家之言蓋極一時之盛論世尙友亦有

取焉

一吾族居潤五百餘年支派繁衍遷徙漸多洪楊之亂郡城久陷  
兵燹以後文獻凋零屬滄海之橫流恐江陵之道盡自念虞翻  
流寓庾信平生表揚先德無能爲力抱守殘闕終懼湮沒遂乃  
裒合成帙用貽後昆拾遺補漏俟登續集

跋論語朱註疏殘本

母舅陳繩齋先生世習名法學獨好治經從東塾先生遊篤守師  
說博通羣籍嘗著論語朱註疏手自寫定積稿盈篋歿後其家人  
不知愛惜散佚殆盡一生心力蕩然灰燼可慨也已余從故紙中  
檢得一冊以示桂君南屏曹君伯陶僉歎其用力之勤搜羅之富  
以不獲見全書爲憾然卽此以例其餘其網羅諸家於朱子所采  
舊說循流溯源音韻訓詁咸有依據上述漢儒經義旁采近人論  
說以證明之可謂博矣惜其時東塾早歸道山不及就正以一言



爲重耳昔毛西河著四書改錯抨擊朱註吾鄉樊昆吾有論語註  
商之作則商訂朱子之註也先生竊比於賈公彥孔穎達之疏經  
主於詮解注文闡明一家之學意在尊朱且以見宋儒不廢攷據  
漢宋門戶之爭可化也此卷爲公治長全冊篇中多論時賢攷證  
詳核因思論語言考古者江慎修鄉黨圖考一篇最著此則全書  
散佚謹留片羽尤可寶貴誦其書以知其人讀者當不以殘篇斷  
簡而忽視之也

永安鍾義士亭碑記

自古忠義之氣磅礴鬱積往往歷千百年而益以光大其在海濱  
下邑史乘闕略幽潛之德待闡於後人者尤多明義士鍾公丁牛  
宰後覺永安琴江青溪約蠟石坑人考諱國祥諸生育子二人公  
居長幼負神童譽年十二補博士弟子員崇禎壬午幾社名士夏  
公允彝典粵試拔公第一有天南異人之稱時流寇徧天下會試

道梗不果行甲申京師陷公聞變痛哭及王師南下所至歸附公  
傾家招集義民力圖恢復有衆千餘屯於邑之下凹山桂王授福  
建監軍道陞參議遷廣東按察使司副使與汀州賀總兵惠州黃  
總兵鏖戰相持累年尋桂王西奔號令不及公知事不可爲乃散  
其兵耿尙二王以書招之永安令王孫蘭副總黃應傑等皆貽書  
相勸公答書不屈風霜凜然論者謂公世居南嶺爲文信國駐師  
之地流風餘烈非偶然也然公之姓字不登於明史不詳於省志  
今所傳義士集掇拾於劫灰之餘清道光後邑人許鼎亨編輯長  
樂溫訓爲之序公以名解元擢監司稱曰義士從其初也自是而  
後祠廟馨香流傳不朽則忠義之感人者深耳公以頑民自處又  
言霜鬢在堂所欠一死公之不死以親在也節彌堅心彌苦或誣  
其屈受冠帶殆不足辨矣公解兵後遁爲僧號懺雲居藍塘之彼  
岸庵著四書明微十二卷今存四十餘節附刻集後其論志士仁

人不以生死動其心又曰士窮見節義非隱以自喻者耶嗚呼百世下可以興矣歲乙亥邑人建公園於紫金山上工既竣流覽名勝景仰前賢以公精忠亮節足爲山川增色爰就雄鎮樓舊址築義士亭以資觀感次其一生行誼泐於碑重爲銘曰

嗚呼義士君亡不可以仕親在未可以死也抗志孤往艱貞以自矢也遺書流傳風霜滿紙也金山峩峩後人所仰止也翼然斯亭雄鎮樓之故址也

因樹園耆舊會圖記

因樹園者張君仲球別墅幕申屠因樹之屋以名其園也山對萬松地拓十畝修篁夾道古木捎雲迤邐而入仄徑盤紆空曠忽開疏籬掩映小亭一角矮屋數椽砌石栽花分畦種菜有輞川之勝無金谷之華其中爲佛堂爲畫室外則紅欄繚繞碧沼澄鮮俯臨清流旁建曲謝囊結詩會顏曰陶社今者吟壇復開游侶益盛喁



于互唱有井水而能歌朋從偕來信山林之足樂履綦亂於苔印  
壺榼挈於花陰時或商量食譜品第茶經談諧脫略何問主賓光  
景流連遠隔塵市足使逋客忘其羈苦者焉主人夙耽禪悅坐擁  
書叢喜集勝流閒尋俊約詩心畫手分蘭菊於春秋酒賦琴歌翫  
花月於晨夕屬以海桑屢變風萍乍合襄陽耆舊多避世之衣冠  
永嘉流人類搏沙之蹤跡華嚴劫後迭換星霜真率會中能談歲  
月東海久客憐邴管之未歸南皮舊遊憶應劉而傷往茫茫身世  
落落賓朋謝傅絲竹之感已過中年右軍觴詠之懷難忘陳迹爰  
乃寫以丹青託之吟詠繪鄭奐耆英之像敢竊比乎前賢題張爲  
主客之圖庶長留乎影事云爾於是張君白英作圖諸君賦詩而  
余爲之序圖凡十一人施兆浚蘭初陳國光蔚秋王耐茶亦鶴何  
步瀛蓬洲鄭壽祺頤伯錢寶齋二南張逸純初黎中岳耀雲陳肇  
愷叔舉主人及余也時辛巳中秋後一日

鄧端履傳

公姓鄧氏諱承修字鐵香廣東歸善人先代由嘉應遷惠州父玉樵公以蠅業起家公幼而英特習武事年十五折節讀書補縣學生舉咸豐十一年鄉試援例以郎中分刑部公在官絕干謁日惟究心於朝章掌故慨然有經世之志同治八年補四川司郎中以御史記名十二年授浙江道御史丁父憂歸服闋補雲南道御史督給事中時光緒初元言路最盛詞臣寶廷張佩綸黃體芳張之洞鍾翰林四諫臺臣則鄧慶麟孔憲毅洪良品咸號敢言公相與排壓風節尤峻首以水災請勤修省屢疏言澄清吏治整頓科場嚴核關稅禁收賭捐皆奉 俞旨論劾部院封疆大臣及監司守令諸不職者先後凡數十人黨處有差又奏時政闕失嚴劾樞臣言尤切直時以鐵漢稱之五年出使大臣崇厚與俄人擅定伊犁界約險要盡失廷議廢約備戰公上言地不可棄兵不必動請另

派使臣往議不至驟開邊衅時在籍侍郎郭嵩燾號熟悉洋務與公議合卒由會紀澤使俄另定條約於界務商務多所改正其議自公倡之也十年法越事亟公疏凡十三上規畫甚備其要言敵以兵艦數十艘擾我沿海往來飄忽我疲於設防而窮於制敵唯越南一隅腳踏實地戰事之始終兵機之轉圜實繫乎此邊境遼濶必須滇粵數路進攻同時並舉方克有濟力保馮子材王德榜諸人其後鎮南關一戰馮王各軍聯絡接應敵大挫衄遂急急乞和皆如所言朝廷屢采公議知其洞明邊事可大用擢內閣侍讀學士轉鴻臚寺卿尋有總理衙門行走之命總理衙門以親王領其事與樞廷並重公驟膺異數疏辭不許諸大臣以公倔強多忌之公亦不爲遷就旋以論救中允樊恭煦嚴旨詰責上意終嚮公坐鑄秩仍留任命偕尙書錫珍佐李鴻章與法使商定和約約成乞假歸省未出都命赴廣西會勘中越分界公馳至龍州單



騎出關與法使浦理燮會議改正新界浦理燮力持先勘原界公  
曰勘界而不改正雖斷吾頭不能從也浦知不可奪陽許歸文淵  
保樂海甯而陰電其駐京使臣詆公違約非勘原界將罷議詔  
催速勘公歷陳三難二害上責以遷延固執予嚴議公迫於朝  
命扶病冒瘴癘以行會浦使亦病廼暫停勘久之法人別遣狄隆  
來堅請按圖畫界爭論未決遽以兵驅江平黃竹居民內徙公注  
復詰難廷臣恐敗成約許法使請凡未定之界在京商定諭公  
先勘欽西至桂省全界兩國所不爭者且界圖以上馳驛回京會  
澳門議約意見多不合獨不署名十四年乞解職歸養疏再上允  
之公喜接納名流宜都楊守敬嘗主其家與之攷訂金石文昌潘  
序最相得每具疏必往商榷或謂語過戇直恐得罪公弗顧也出  
都日諸名士餞於棗花寺會稽李慈銘贈詩云五十養親人子少  
九卿高蹈近時無殘棋入劫空持局孤柱橫流敢惜軀自此遂不

復出公居諫院十年海內想望丰采是時士大夫爭尚名節大臣  
猶畏清議公直言無所瞻顧洊居要地謬如故旣乃奉使萬里  
馳驅盡瘁終與同官齟齬以去不究其用時論惜之自公去後同  
時言事諸臣亦一時雲散其後以直諫著者屠仁守吳兆泰朱一  
新安維峻相繼獲咎無以作敢言之氣俯仰世變輒慨然於直道  
難容而尤有人亡國瘁之痛也公清操卓絕魄遺無所受旣入譚  
署總稅務司年餉王大臣各數千金名曰津貼公獨卻之歸後讀  
書養母蕭然寒素邑人延主豐湖書院講席公別創尙志堂課以  
古學倡建崇雅書院士風一變平時論學以宋儒爲宗砥礪名節  
書法由北碑入參以篆隸瘦硬自成一家晚年家居時以鬻字取  
給布衣徒步力持儉約而於族中孤寡恒周卹之鄉里莫不感慕  
十八年卒年五十二母太夫人猶在堂後

年卒配林夫

人子五和江蘇直隸州昀民政部主事旭暉晃出爲堂第後女適

任適陳適任適吳適張適梁孫二人所著語冰閣奏議若干卷詩文稿藏於家宣統元年粵督張人駿疏公學行事績宣付國史館立傳

論曰海禁既開外侮日迫獨俄法二役不失國體朝廷料敵制勝於公所陳奏多見采納異於空言無當者也若其彈劾不避權貴整飭綱紀非徒以抨擊爲能矣中葉而後日韓事起論者爭言戰而開於敵情一敗不可收拾庚子拳亂言者被奇禍國事益壞余讀公奏議數其識略之遠又幸生不諱之時得以盡言也今揭其大者著於篇俯仰數十年政變之遷流亦略可考見焉

江甯提學使陳文良公傳

公諱伯陶字子礪姓陳氏廣東東莞縣鳳深鄉人曾祖允道祖夢松父銘珪咸豐壬子副貢皆以公貴贈榮祿大夫贈公邃於學爲順德梁章冉先生高第具有淵源公少奉庭訓稍長從陳東塾先



生遊學益進光緒乙亥補縣學生己卯舉鄉試第一己丑考取內閣中書充咸安宮教習館順德李文誠公家壬辰成進士廷試一甲第三人及第授翰林院編修歷充國史館協修纂修總纂編書處纂修起居注協修文淵閣校理武英殿協修纂修雲南貴州山東鄉試副考官庚子景廟西巡奔赴行在請於西安建立陪都雖未行世偉其議旋隨扈回京乙巳入直南書房以淹雅稱退直後手一編纂修國史儒林文苑傳博綜條流考覈精當繆編修荃孫極推許之今史稿告成兩傳多本於公之手筆也長沙張文達公議廢科舉公言學堂龐雜科舉不宜遽廢當分科取士以廣登進文達不能用丙午學部奏派赴日本考察學務署江甯提學使蒞任後崇實學黜邪說首以忠義勸導務端士習兩署江甯布政使加二品銜賞戴花翎宣統己酉補授江甯提學使公先迎養母太夫人在署至是送親歸粵入都陞見時方厲行憲法而異黨潛

滋陰謀煽惑公見時事日非私憂竊歎又以母老多病遂乞終養  
還里辛亥武昌難作九月廣州城陷黨人譁起洶洶致致公乃走  
避香港奉母居紅磡尋丁母憂移居九龍城九龍古官富場爲宋  
帝駐蹕地公登宋王臺賦詩憑弔感慨歎歎署所居曰瓜廬坐臥  
一小樓湫隘人不能堪布衣芒屨日行田野中村人咸知有陳探  
花熊希齡龍濟光欲挽之出皆絕弗與通聘修省志亦不就著明  
潰民錄以見志願於世道人心無日忘也尤拳拳於故國壬戌大  
婚博成海上遺臣多報効經費公倡貢萬元趨叩闕廷因與梁尙  
書敦彥謀欸接外賓各國使臣入覲如平時召見養心殿溫諭有  
加賜紫禁城騎馬賞帶膝貂褂及南歸上賜高宗御用七寶金盒  
御容一幅御書玉性松心扁額以寵其行甲子乘輿蒙塵公憂憤  
成疾不能奔問馳電中外力爭優待條件兩疏請車駕出洋遊歷  
凡數千言及戊辰東陵被盜公又電請當事緝匪嚴辦亟籌修復

奏進鉅款移書海外僑民歷陳累朝恩澤冀有所感動或怵以恐  
遭時忌弗顧也公十餘年來忠憤鬱積志氣未衰而危疑日迫上  
久駐天津慮有輕躁喜事者妄有陳說貽朝廷憂復剴切上言力  
請遵養時晦以策安全終引老子三寶一曰慈二曰儉三曰不爲  
天下先上嘉納焉御書忠肝古誼扁額賜之公感激恩遇而心彌  
苦矣嗚呼公以愛君愛國之誠不幸遭逢晚季變故迭乘旣天時  
人事之交窮乃獨苦思焦慮以求一當而卒無救於世運之遷流  
此公之隱痛而亦海內遺民所爲不勝悲憤者也庚午八月二十  
日以病卒於九龍寓邸春秋七十有六上聞悼惜賜諡文良賜陀  
羅經被異數也公好學深思博聞強記每論一事皆能舉其本末  
詞翰書畫旁及醫術地理無所不能負經濟才不究其用早歲隨  
贈公讀書羅浮酥醪觀因注籍觀中國變後託於黃冠潛心著述  
成孝經說三卷勝朝粵東遺民錄四卷宋東莞遺民錄二卷明東



莞五忠傳二卷又輯袁督師遺稿三卷附東江考四卷西部考二卷又增補陳琴軒羅浮志五卷重纂東莞縣志九十八卷所作詩文有瓜廬文賸四卷外編一卷瓜廬詩賸四卷宋臺秋唱一卷皆行於世妻方氏妾徐氏龍氏李氏子四祖蔭方出前卒良玉龍出良士李出良祖孫出女九人孫七人

論曰公曩與余同避地香港晨夕過從每有撰著必以見示間述生平行事感慨係之故知公較詳洎余遙里甲子戊辰兩遭奇變公忠義憤發往復商榷一日數函至今盈篋偶一檢視愴恨無已公嘗戲語余他日爲我作墓銘余悚謝不敢當追念故舊日就凋零余亦老病侵尋矣今爲公作傳以存梗概刊石之文俟諸大雅君子焉

湖南黔陽縣知縣陳君傳

君諱慶森字華皆廣東番禺人曾祖諱受培祖諱其鉅父諱昌泳

累代習名法由浙來粵伯祖諱其錕道光丙戌進士禮部主事始  
占番禺籍君弱冠補縣學生中光緒辛卯舉人壬辰戊戌會試報  
罷大挑一等以知縣分發湖南充

科鄉試同考官署華容耒

陽巴陵茶陵等州縣補黔陽縣知縣未履任辛亥遭國變歸里後  
十年以暴疾遽卒年五十六君鄉舉時年甫二十餘才名藉甚羣  
以館閣期之竟不得第出爲外吏無幾微不自得任牧令所至有  
聲吏民安之嘗理災賑勤於民事及罷歸而貧益甚以是知其賢  
君少攻舉業甫壯而仕簿書黹暇獨好爲詩母舅潘若海妻兄陶  
頤巢詩人也相與酬和益肆力焉潘陶旣前卒亂後君亦失職浮  
沈奔走而不廢吟咏早歲才思騰發晚漸歸於平淡詩境日進不  
幸中壽歿矣余與君爲中表長於君回憶春明聚首時已如隔世  
忽忽數十年君家兄弟凋零將盡人事不常輒愴然於死生聚散  
悲來無端因爲述其生平大略如此不敢溢美而君有令子爲刊

遺集又欲述君志行俾傳於後然則君亦何憾耶君配馮繼配陶子四人女三人

誥授通奉大夫翰林院編修吳君行狀

曾祖丹木曾祖妣沈袁

祖廷熊祖妣章

父學均妣梁

里貫廣東番禺縣捕屬原籍浙江會稽縣

君諱道鎔字玉臣晚自號澹庵其先浙江會稽人業鹺於粵遂家番禺三傳至渭川先生生三子君父普庭先生最幼事母孝有潛德君少劬學年十七補縣學生中光緒乙亥恩科舉人丙子丁丑兩上公車皆報罷君故貧授徒養親不亟求進取順德李文誠公雅重君敦促赴試以庚辰科成進士入翰林假歸省親尋丁外艱丙戌服闋入都寓文誠家文誠知君淡泊嘗從容謂曰吾不以



祿仕相勸他日當思吾言也散館授編修君遽歸不復出被服儒素講學終其身歷主潮州韓山金山惠州豐湖三水肆江廣州應元書院又嘗與陳君石樵石君惺庵於郡學設館從學者數百人君日夕手一編博綜經史旁通算術以及泰西政學諸書無所不覽尤拳拳於獎掖人才在潮州最久潮人仰之如子弟之於父兄然君不自表襮澹於名譽素性然也學制初更廣雅書院改爲高等學堂廣雅創建於張文襄公規模宏廓自番禺梁文忠義烏朱侍御掌教後姚謨臣學使丁伯厚侍讀繼主堂事皆以學風嚮競先後辭去當道聘君爲監督君貫融新舊陰納於範圍之中啓迪勸導一出以誠生徒翕服在事八年成就者衆迄於國變諸生以材器稱者多見重於時猶追懷教澤不置歷充學部諮議官廣東學務公所議長粵督張公人駿薦君學行堪備任使報聞君固不樂仕也辛亥後謝絕一切省志局學海堂禮聘皆不就閉戶著述

脩然絕俗工書法求者接踵自言初學爲詩聞東塾陳先生言粵東多詩人少文人因發奮爲古文學其爲文導源於史漢而涵泳於諸子每有所作精心獨造思沈而氣銳力矯浮靡仍具深微淡遠之致顧嘗論文之至者妙合於自然著力求之終非極詣於粵中先輩最推彭春洲猶謂其時有矜意之處蓋君所得既深勤一世於文字之中自視常欲然而論者咸重君文以爲卓然可傳非拘拘於桐城陽湖諸家各分派別也君既專攻古文迺博攷吾粵作者以明季屈氏文選 國朝乾隆中溫氏文海傳本日少惟故家間有收藏遂根據二書而益加蒐討前代散佚者輯補之嘉道咸同光宣間諸人遺著悉力甄錄彙爲廣東文徵凡七百餘家文三千餘篇纂輯之勤歷二十年病中猶校補弗輟也君長身玉立翁文恭公以名士稱之爲學不立門戶不設厓岸延接後進懃懃懇款人亦樂於趨附晚遭喪亂憂時感事作爲詩歌託於諷諭未

嘗爲過激之詞獨於出處之際確乎有以自守所謂和而介者歟  
故國之思老而愈摯已已重遊泮水癸酉重逢鄉舉皆蒙 恩賞  
扁額曰行爲士表曰劬德引年歿後 賜額曰抱璞懷貞 天語  
之褒世以爲定論云丙子閏三月二十八日病卒春秋八十有四  
遺命以道服檢滄桑後著籍羅浮酥醪觀配張繼鄧側室符子景  
涵游學美國景洵景沂前卒女適楊適章適張適鍾適韓適陳孫  
祥臨曾孫傑才葬於廣州東門外石鼓岡與鄧夫人合窆所著書  
已刊者明史樂府八卷續修番禺縣志手定條例成書四十四卷  
未刊者廣東文徵二百四十卷早歲著公羊質疑未成詩文稿藏  
於家余與君交稔申之以婚姻君歿其門人屬爲君行狀逡巡未  
有以應旣思君學行不可以無傳廼掇拾其略以著於篇俟後之  
君子論定焉

誥授通奉大夫日講起居注官翰林院侍讀丁君行狀



曾祖旭

本生曾祖清國學生

祖杰道光二十九年舉人按察使銜福建候補道

父志壁縣學生候選同知

里貫廣東番禺縣捕屬原籍安徽懷甯縣

君諱仁長字伯厚晚自號潛客先世由皖來粵遂爲番禺人君幼承家學沉默自守十一歲作古石賦隱然見堅白之操識者知其不凡年十七補縣學生中光緒八年舉人九年成進士改翰林院庶吉士十二年散館授編修充國史館協修通籍後閉門讀書不事干謁被服如諸生十七年充貴州鄉試正考官十九年充順天鄉試同考官二十年大考二等以侍講升用日韓事起畿輔震驚君與同官集議於松筠庵籌畫戰守効疆臣之貽誤者呈掌院代奏請起用恭忠親王入輔大政上書恭邸敷陳剴切二十二年補

侍講轉侍讀充日講起居注官君首疏請開講筵又請力崇節儉  
歷陳內務府積弊言尤切直奏入留中復蒐集經史以類鈔纂分  
九法九戒恭引列聖大訓兼採諸儒粹言其大要以正君德爲先  
推及於用人行政宏綱細目罔不具備繕成五冊進呈得旨留覽  
以父病請急歸未抵里父卒不及視含抱憾終其身遂不復出時  
譚文勤公鍾麟督粵聘主越華書院教諸生於制義外以經史實  
學親爲講授孳孳不倦文勤雅重君賓禮有加君語不及私偏於  
地方利弊無不盡言故督提鄭紹忠所部安勇夙爲粵人倚恃客  
軍忌之將事裁撤君陰爲調護不以襮於衆也二十六年鑾輿西  
幸君倡議貢方物奉旨嘉獎是後廷臣爭言變政遂有裁書院改  
學堂之議君以爲學堂初開首在宗旨純正主持得人乃無流弊  
創議撥惠濟義倉欸開辦公學定名教忠學堂寓意深遠尋兼大  
學堂監督存古學堂監督分科教授成就甚衆粵省盜風素熾鄉

里無賴勾結爲患吏不能捕君以爲清查保甲聯鄉自衛古法也請於省垣設團保總局持論侃侃與當事忤稍牽制之其後迫於朝命勉從其議然事權既輕收效亦微非君志也宣統初元大臣有薦君者特旨來京預備召見以母老辭辛亥後遂絕口不言時事太夫人春秋高君年且六十依依若孺子慕先意承志務得歡心居喪三年未嘗脫纓經服闋值乘輿播遷奔問行在屢有獻替輒蒙嘉納賜館賜金君感激恩遇翬翬効忠復輯中興金鑑先正讀史法無逸齋十二思表各一卷奏進每念世變之大人之事窮夙夜痛心積憂成痼去冬中寒疾幾殆猶依戀不忍言去卒前數日方請對歸而疾亟遂綿惓不起丙寅八月三十日歿於津寓年六十有六配馬夫人前卒以弟仁濟子曰全爲後奉君喪歸粵君爲學以宋儒爲宗性嚴正造次必於禮居官不驚榮進嘗以古名臣自勵旣養親不出猶欲有爲於鄉里遭遇時變志事百不得展



獨其始終一節介然有以自守而不爲外物所奪可謂篤信好學  
守死善道者已晚歲課徒自給以朱子小學及人範教其門人有  
欲致君者聘修省志不就邑人續修縣志君爲總纂用力勤摯古  
文獨得雄直氣詩學韓杜時亦沈鬱似騷選所著有毛詩傳箋義  
例攷証若干卷晚纂論語衍義未成並詩文稿藏於家余與君有  
連又同館爲後進住在京師猶及承平分題角藝過從甚歡泊朝  
局數變君已歸養嘗貽書論時事力言憲法不易推行然民氣壅  
遏亦當有以宣通之惄然憂亂之將至其後余居香港君率母三  
遷相見益親每話前事不禁歔歔唯以各保歲寒爲勛去歲冒暑  
趨朝余往送君珍重言別不謂其浩然長往竟成致身之志也嗚  
呼悲已君歿後 賜額曰履潔懷清天語之褒足以昭示百世謹  
爲述其出處大節學行梗槩以俟立言者採擇焉

誥授朝議大夫湖南優貢知縣汪君行狀

曾祖 敕封文林郎曾祖妣氏錢敕封孺人

祖雲道光壬午舉人遂昌縣訓導誥贈朝議大夫祖妣氏薛誥贈恭人

父取同知銜誥贈朝議大夫妣氏盧誥贈恭人

里黃廣東番禺縣捕屬原籍浙江山陰縣

君姓汪氏諱兆鏞字伯序號懔吾晚號清溪漁隱祖籍浙江居粵久遂爲番禺人唐越國公汪華之後元末自婺源遷山陰十二世祖應軫明正德中名臣著青湖文集君父省齋先生道光末遊幕來粵有聲於時著省齋詩存生四子君居長幼穎異過目成誦十歲能詩十一歲遭母喪哀毀如成人值諱日悲泣素食終其身年十八侍從父穀庵先生讀書隨山館致力於經史古文詞學學海堂專課生爲東塾陳先生高第與從兄兆銓及同邑梁鼎芬陶邵學蕭山朱啓連新會陳樹鏞以道德學問相切劘學益進光緒六

年補縣學生十一年以優行貢成均朝考用知縣十五年舉於鄉  
庚寅壬辰會試兩選臚錄南歸以世習刑名學客赤溪遂溪順德  
各縣主者金武祥嚴崇德皆有循吏名佐治之力爲多君不自矜  
也尋管樂桂埠嵯務岑春煊督粵慕君名延入幕司章奏獨加敬  
禮去任時奏保四品頂帶以知縣分發湖南初君志用世嘗欲投  
効山東河工伍廷芳使美奏派參贊皆以親老不果往至是將試  
吏湖南復不果仍返樂昌又五年而國變樂邑有倡亂者君設計  
解散之遂歸廣州嵯商舉爲鹽政局長當道延爲顧問亟避居澳  
門省志局聘任總纂亦不就岑春煊再出遣使招君君心弗善也  
拒不見自是二十餘年粵亂靡定移家者數四海濱重遊益不勝  
風景山河之感待清無期而君竟長逝矣君性和易獨介然有守  
於世俗謬悠之論尤深惡之嘗誦崔清獻公無以學術殺天下後  
世語歉歔感歎自邪詖交熾蔑棄名教或假愛民之說以行其權



利之見所爲無非害人者君著說忠說仁兩篇辭而闢之以爲人心世道之憂不可不辨也又謂變法當因時損益而必以禮教爲本徒一切沿襲彼法無益於國有害於民孳育亂萌貽患尤烈又謂孔孟論政曰民信曰人和民不信人不和不待外侮而其禍在蕭牆之內平日深矚世變於其流極所趨言之絕痛及夫禍敗已見若燭照而數計也桑海旣更內難迭作日相尋於干戈學校凌夷禮法蕩然以盡君篤於守舊春秋祀典以時修舉嘗思與二三耆宿發揚聖教漸被儒風維綱常於垂絕終以清議力微無救於陸沈之禍端居太息時時託於文字抒其悲憤迄乎喪亂之餘猶著述不輟昔東塾避兵橫沙顏所居曰崇雅樓爲銘以自勗可以喻君之志矣辛亥後君兩至羅浮注籍酥醪觀自號覺道士返會稽謁先墓追述舊德流連久之過杭州遊西湖歷蘇常徧覽虎邱惠山諸名勝渡江登金焦絕頂所至皆有題詠歸至滬與海上名

流唱和歸安朱祖謀義甯陳三立甯鄉程頌萬仁和葉爾愷海鹽  
張元濟陽湖錢振鐸咸相推挹所作三秀才行錢塘吳慶坻采入  
辛亥殉難錄黃巖楊晨贈詩以羅浮仙客稱之黃巖王舟瑤疾亟  
遺命乞君作傳聲譽重一時顧謙挹自下延接後進不少立厓岸  
精鑒賞富收藏訪求明遺老書畫不惜重價曠世相感拳拳故國  
之思壬戌粵人貢方物君未階朝籍凡有進奉無役不與蒙福字  
之賜嘗以賜福名其堂歿後賞志節不移扁額咸以爲無愧云於  
學無所不窺方聞博識乙部尤淹貫爲文兼工駢散而長於考據  
訂訛補墜多發前人所未及君於金石之學極推錢氏竹汀精覈  
似之詩詞託意深婉皆卓有雅音不詭隨俗尙其品格亦可見也  
著有孔門弟子學行考四卷補三國食貨刑法志各一卷晉會要  
六十卷叙目一卷廣東元遺民錄二卷續碑傳集三編五十卷叙  
目一卷微尚齋雜文八卷詩二卷續四卷雨屋深燈詞一卷續二

卷嶺南畫徵錄十二卷續一卷補遺一卷續貢舉表一卷番禺縣  
續志四十四卷山陰汪氏譜表一卷錄一卷附錄一卷老子道德  
經撮要一卷樓窗雜記入卷澳門雜詩一卷輯刻五百四峯草堂  
集外詩二卷東塾遺詩二卷憶江南館詞一卷補遺一卷尙有日  
記數十冊存於家君生於咸豐辛酉年四月二十八日以己卯年  
七月二十八日卒於澳門春秋七十有九配陳恭人前卒側室陳  
陳梁子六祖澤宗洙宗澧宗準宗藻陳恭人出宗衍陳孺人出宗  
澧幼殤女三長殤次適張樹蘭三適鍾祐慶孫男十五人德晉德  
亮德業德剛德璇德中德靖德增德森德堅德隅德霽德霖德權  
德鴻孫女十九人曾孫男潤書曾孫女四人將於某年月日歸葬  
於廣州城東三寶墟蜆岡之原與陳恭人合窆焉余與君交最夙  
逾五十年亂後相見垂垂老矣往余避地香港君常在澳其後同  
返廣州蹤跡益親君有所作必以見示因得徧讀所著書及詩文



集知君故詳去秋來澳君實招致時得過從歲初同詣蓮峯寺禮  
佛各爲詩紀之未幾君病不復出然旬日必數見猶能劇談不謂  
遽謝人事也彌留時促余往訣以所輯碑傳集屬爲參訂又言一  
生志行余知之深自維謏陋蓋有愧於其言而累行迷德後死之  
責亦不敢辭也曩與陳文良公伯陶丁潛客仁長遊處其歿也君  
嘗督爲傳狀今以倮然待盡之身泚筆狀君能勿泫然爰撰次其  
行誼著於篇君知交徧海內其必有感於斯文已

清都察院副都御史南書房翰林溫文節公神道碑銘

歲己卯秋九月癸卯前都察院副都御史南書房翰林順德溫公  
疾終里第春秋六十有二遺疏聞優詔褒卹賞治喪費予謚文節  
海內舊臣罔不嗟歎吾粵自梁文忠公鼎芬後繼之者唯公一人  
靡鬲之翊中興衰偃之從患難二十年間孤忠大節其人零落以  
盡尤可悲也公諱肅原名聯瑋字毅夫號璧庵晚自號清臣世居

順德龍山鄉代有聞人曾祖諱昌虞祖諱維城潛德弗仕父諱黻  
廷同治戊辰進士戶部主事里居授徒學者稱藻裳先生三代以  
公貴贈光祿大夫曾祖妣葉祖妣陳妣黎生妣余皆封夫人公十  
二歲能作文爲戶部公所賞異年十九補縣學生光緒壬寅順天  
鄉試舉人癸卯成進士改翰林院庶吉士散館授編修宣統庚戌  
補掌湖北道監察御史值朝議倡言立憲風靡一時而大權寢至  
旁落公痛陳新政流弊謂以紛更爲振作以塗飾爲文明以囂張  
爲士氣是率天下而爲僞也今亂機四伏亟宜籌消弭之法屢劾  
親貴重臣及部臣彊臣之不職者在臺一年章數十上於國家存  
亡得失之故反覆言之冀當事者之一悟疏皆留中辛亥變起攝  
政王避位公言監國受 景皇帝付託之重義不容引退不報遂  
自請解職梁文忠公鼎芬至京寓公家有所規畫而力不能有爲  
文忠去國公獨留俟時觀變壬子五月赴瀋陽以大義說趙爾巽

勤王爾巽不能用是時恭親王溥偉由大連移居青島遺臣咸集  
公與德化劉文節公廷琛湘鄉陳侍郎毅等密謀匡復奉新張忠  
武公勲方駐兗州往來通問又約前陝督文忠公升允起兵西北  
袁世凱偵知之使其黨王天縱陰伺掩捕節愍公玉春朱貞愍公  
江同時被難公亦幾不免會忠武移鎮徐州公客幕中走金陵結  
馮國璋相與交懽赴邕謁陸榮廷赴粵謁龍濟光皆以忠義激動  
之袁死奉直蘇皖諸帥聯盟推忠武爲盟主丁巳五月復辟授公  
都察院副都御史未到官而中變公南歸以電責馮國璋志氣彌  
厲聞者壯之辛酉德宗實錄告成賞頭品頂戴壬戌入都賀大婚  
賜紫禁城騎馬癸酉直南書房恩賚稠疊逾於平時甲子隨扈天  
津疏請端主德以恢大業進貞觀政要講義閩縣陳文忠公寶琛  
題詞有曰虎口餘生益倔強又曰講義敷陳卽諫章皆紀實也新  
京肇建公已患痺疾強起趨朝屢據忠讜上嘉納焉旋以病乞歸



上念公不置迭賜帑金五十六十生辰賞扁額公子必復供職內  
廷召對慰問惟上知公之深與公效忠之摯契合無間而運窮事  
極江湖魏闕之思日縈繞於夢寐而有所難言若其抗心孤往始  
終一節萬變莫能奪也嗚呼天鑒之矣歸里後鬱鬱久居比歲被  
兵獨得安堵時比於通德之鄉平日於鄉邦文獻多所纂述博聞  
強識詩文皆淵雅於公爲緒餘也著有奏議四卷文四卷詩二卷  
年譜一卷藏於家已刊者貞觀政要講義陳獨漉年譜所輯有龍  
山鄉志龍山文錄詩錄溫氏族譜又輯感舊集未成配黎夫人前  
卒側室鄧伍子六入必復必達必果必信必清出嗣子必穀女四  
人適黎適周餘未字必復等葬公於龍山之龍頭崗與黎夫人合  
窆焉余與公先後爲詞臣言官曩歲分巡濟東公遊泰山始得相  
見國變後公勤勞王事丁巳之役不幸中蹶未嘗自餒也壬申訪  
公於杜鵑庵夜分深語所望於公者至厚不虞其僅得中壽也必

復奔喪過謁涕泣請銘不敢辭乃爲銘曰

百六之運身世多屯疾風勁草乃識貞臣前席陳謨大廷獻議未盡人謀遽悲天墜烈烈葵霜膽懣肝披知公赤心靡鬲相期唐禍諸藩漢厄十世忠義激發誓同匡濟中天復旦蔽以重陰梟獍狘猖鸞鳳湮沈邦舊命新東都肇建杜陵麻鞋曲江羽扇夢爭王室魂繞君門甯甘遺佚終訴煩冤長血雖埋鄭心不死最迹鐫詞敢告惇史

濟南府知府黃公墓志銘

歲丙子冬十月癸亥前濟南府知府石孫黃公以疾卒於青島海濱抗節逾二十年少保定園朱公聞於朝 賜潛志效忠扁額惟公譽謬匪躬貞介絕俗得 天褒而論定公子孝先等以書來請銘余不得辭公諱曾源字石孫晚號槐廬本貫奉天鐵嶺國初有諱希宣者以軍功官副都統駐防福州後徙閩縣洋嶼鄉世爲福

州駐防漢軍正黃旗人祖諱恩貴道光丁酉舉人廣東新甯知縣  
父諱運昌福建雲霄同知公少慕節義讀黃石齋先生集以古人  
自期許弱冠補諸生雲霄公遽歿官私逋負累鉅萬益刻苦力學  
光緒戊子舉於鄉庚寅成進士改翰林院庶吉士散館授編修充  
國史館協修方略館功臣館會典館纂修協辦院事撰文處行走  
京察一等轉山東道監察御史歷掌江南四川河南道督理街道  
署禮科給事中通籍後究心時務洞知中外大勢官翰林已慷慨  
言事甲午中東之役日人索我台灣公謂以台灣資敵則其勢益  
張匪唯中國之患亦環球大局所關請聯絡邦交熟權利害不可  
輕於棄地議雖不行時論重之庚子拳匪倡亂大臣多附和者公  
執言侃侃不爲威怵及聯軍迫京師兩宮西狩人情惶擾請懲  
辦禍首早定大計車駕回京廷議爭言變法復疏請詳求治理  
謂法不變則弱弱必亡變而不得其道則亂亂且速亡其語絕痛



時方狃於更新紛呶不已公以爲禦侮之效難知閱牆之釁已搆  
迨禍變迭起皆如所言乃歎其識慮之遠而當軸莫之省也封章  
數十上若尊主權清治本懲貪邪抑奔競整頓上書房皆切中時  
病爲權貴所憚與中江王乃徵瀘州高枏稱三諫直聲震一時出  
爲安徽徽州府知府徽地瘠而俗囂民教交閥訟經年不解公平  
亭曲直無不悅服羣情貼然在官三年懲治奸蠹解除苛堯風氣  
爲之一變調青州其爲治如徽州政舉而民不擾再調濟南大計  
舉卓異河防叙勞保道員顧省會首郡上不得專制下不得親民  
不獲竟其施值籌備立憲枝梧萬端益與公夙心刺謬時時有遂  
初之志武昌變起海疆騷動東帥謀獨立公義不苟從亟引疾去  
閩亂不能歸寓青州十四年公舊治也州人愛戴不衰旋徙膠島  
蒿目橫流忠憤鬱積晚歲得風疾遂至不起春秋七十有九公性  
伉直恥事媮姁疾惡嚴而宅心獨厚清操卓絕被服如寒畯少丁

家難晚值國屯顛沛流離硜硜之守不踰尺寸嘗自言立志堅定可質古人數十年如一日也竄身海島聲銷影沈故國之思彌摯曰潛曰忠庶幾無愧矣生平篤於內行撫育諸弟資以成立教子不驚時趨繼起多才領袖後進人倫之望當代所稱配史氏王氏繼配支氏子四人孝先孝紆孝平孝綽女四人長適支懋年次適王世楨餘待字孫七人爲憲爲爵爲佶爲龍爲倬爲伋爲俊著有奏議若干卷並詩文稿藏於家某月日孝先等權厝公於青島京山之陽萬國公墓待他日歸葬焉余與公鄉會同年同出典郡余守濟南擢濟東道公繼余任晨夕相過深談恒至夜分同官詫爲未有遭時多故輒與私憂竊歎懼禍至之無日泊余改官江右瀕行時以各保歲寒相勗不謂遂成語讖也滄桑後遷徙靡甯猶以時通問嘗思一見終不可得世難未已而公竟長逝矣余以衰病之身僂然待盡愴懷今昔流涕而爲之銘銘曰

奮跡將門樹望台閣威鳳九霄神羊一角祆氛召亂 乘輿播遷  
屢陳讜論燭照幾先汲黯淮陽龔遂渤海臥閣私憂登車危涕高  
春景迫大陸流橫萬變譎詭孤抱堅貞東陵鋤瓜西山餐蕨人識  
故侯帝褒清節唯余於公如雲逐龍鵠華一別夢斷驚烽浩劫自  
天悲歌何地想像平生淒涼隔世足音空谷心事寒灰鐘詞埋石  
莫知我哀

學部主事楊君墓志銘

同歲生楊君裕芬歿後六年子履瑞哀君遺著上於 朝 旨  
留覽 賞經明行修扁額一時傳爲曠典君平生學術一出於正  
晚抱孤忠鬱鬱以歿黃巖王君舟瑤旣爲之傳履瑞葬君於廣州  
城北蚨蝶嶺祖塋復具狀請銘余不得辭君諱裕芬字惇甫廣東  
南海人父守和本生父守恕附貢生以孝友聞君幼而端重遊陳  
東塾先生門爲學海堂專課生補縣學生光緒戊子舉鄉試第一



甲午成進士以主事用分戶部調學部加員外郎銜君通籍後在官日淺講學授徒一如寒素其爲學服膺東塾不立漢宋門戶淹貫羣經於三禮尤精熟嘗欲本經正無邪之旨以維人心風俗南皮張文襄公雅重君聘主兩湖書院經學講席先是文襄督粵時仿阮文達學海堂遺意創立廣雅書院分科課士兩湖規制如廣雅君教諸生以先儒立身讀書之法務抑囂競納於正軌成就甚衆其後舉行新政改學堂廢科舉派東西洋留學生文襄負重望著勸學篇調停新舊君獨謂新政更張梯媒險躁之士動搖國本是大可憂當時或疑其言之過十數年來思君前言如燭照而數計乃歎其所見遠也君在鄂五年以母老辭歸迭主講鳳山明達端溪各書院學制改後京師大學及行省各學堂爭聘君皆婉謝肇羅道易君順鼎聘爲實業學堂監督甫兩月辭去嘗歎曰今日學風雖昌黎復生障川挽瀾亦苦無著手處余病未能也丁未入

都供職會文襄管學部奏調入部審定圖書凡宗旨乖謬議論偏  
謬者必爲駁正然不諧於俗浮沈郎署終恨力微無大挽救去志  
遂決辛亥八月假歸甫抵里而變起黨人洶洶以剪髮相迫脅君  
曰吾留此以見 先皇帝於地下屹然不爲動間作道士裝語及  
時事稠人廣坐譙呵無所避衆目爲狂弗顧也時主粵局者多君  
門人欲禮聘君亟嚴詞拒絕癸丑 崇陵奉安君於北郊素衣冠  
望祭痛哭失聲有言 大清苛虐病民者君根據掌故歷舉 先  
朝仁政駁斥其非聞者不敢復言晚歲假寓華林寺報恩堂以報  
國自誓橫流波靡耿耿之懷無可告語自是精力漸凋耗矣甲寅  
六月疾終春秋五十有八配梁夫人前卒子三人履瑞梁出履璋  
履聰蓮室李出女三人所著遜志堂經說文集補三國疆域志今  
釋若干卷履瑞進呈 御覽稿藏於家余與君同舉鄉試稔君學  
行癸丑相見於香港款款世變君高談大睨意氣猶昔曾未踰歲

賡恨遽歿今二十年矣世難未已朋輩益寥落余衰病恨不得死  
傷時感逝因履瑞之請乃爲敘次其略而系以銘銘曰

賦觥雷塘肇開嶺學宗鄭述朱書傳東塾君守師法掣習禮經講  
授楮舍對揚大廷世變遷流邪說競作羣陰沈沈一士謬謬履霜  
憂漸厝火燭先予幸言中禍至滔天始自用夷終乃召寇彝戮網  
淪率人而獸避俗若浼避世佯狂晞髮哭謝埋血哀長育子抱書  
達於宸扆天鑒孤忠哀衷錫美嗟余後死感舊獻款九原不  
暇視此銘詞

二品頂戴按察使銜福建汀漳龍道何君墓志銘

君諱成浩字璧流姓何氏廣東順德良教鄉人世有潛德父應念  
經商水東鎮粵寇起首創義軍敘功保游擊賞花翎事蹟載高州  
府志以君秩誥贈榮祿大夫君少席豐厚劬學如寒素光緒戊子  
舉順天鄉試援例以郎中分戶部江南司行走乞養歸旋遭艱服



閩改官福建候補道歷辦善後稅釐農桑局總理全省軍政事皆  
辦治閩督卞公寶第邊公寶泉譚文勤公鍾麟李恪勤公興銳並  
以清節著咸倚重君累章奏保傳旨嘉獎軍機處存記賞按察使  
銜二品頂戴兩署督糧道汀漳龍道一署興泉永道尋授汀漳龍  
道君爲政鎮靜不擾整飭風紀裁革陋規所至有聲漳州惠水倡  
辦工賑築堤修橋以資捍禦漳人至今稱頌辛亥大計卓異會武  
昌發難閩垣兵變以君夙綰軍政將推爲都督君亟避去遂棄官  
歸杜門不復出家故饒以豪俠傾其資君貞介自守誓不入官府  
絲業研究所舉充所長辭不就番禺梁文忠公鼎芬以貞士稱之  
初居會城旣以貧貨其居挈家返良教窮鄉蟄處生計猶不給體  
素羸善病時時有憂生之嗟晚歲益獲落人所不能堪也君生長  
華廬敷歷外臺名業日隆駸駸且大用一旦聲銷景沈獨不肯稍  
稍貶節雖極困阨之餘沒齒而不悔嗟乎士窮見節義不奇窮節

亦不著余觀滄海後遺佚之士大率徜徉肆志焉耳若貧乏無以自存姑艱苦而不負所守者不數數觀也如君者可謂難矣余與君同鄉舉中年仕宦奔走相見日少自遭喪亂朋舊益親君鄉居歲一至省垣殷勤道故方君盛時推解無所吝及家中落百物蕩盡君雖豁達未嘗不念人事之變遷相與感歎也甲戌三月以疾終春秋七十有一配蔡夫人先君卒子五人英著葆萬舊將葬君於白雲山鳳凰窩之原惟君貞操介節有不可泯滅者乃爲序而銘之曰

惟豐與嗇境不常始席華撫終窮鄉繡衣持節名績彰祆霧突起天茫茫被髮無路排九閭歸與田父談滄桑故山何必非首陽守死弗變是爲強白雲之顛毅魄藏千年松柏凌冰霜

安徽滁州直隸州知州李君墓誌銘

同年李君晉熙歿後十餘年其弟晉燾以遺集寄余而屬爲埋幽

之文余與君同舉光緒十六年進士又同入翰林君固晚達座主  
大司寇貴公一見輒曰春卿吾二十年舊交也順德李文誠公亦  
以老名士目君稱爲今之唐堂蓋君善集句知名於時彼時同謁  
師門依依如昨今朝市陵谷春明故人零落殆盡追念舊遊愴恨  
無已其何能辭君諱晉熙字春卿廣東海康人曾祖斐然祖暉曜  
父杜皆以明經隱於鄉里君少隲異爲郡守丁公浩所識拔偕往  
瓊州賦孔雀詩驚其坐客中同治庚午副榜主試謝公維藩視學  
山西邀君入幕因得縱覽山川名勝作爲詩歌益以發其嶽崎磊  
落之氣又十年光緒乙酉舉於鄉庚寅成進士改翰林院庶吉士  
壬辰散館改工部主事工部固閒曹君亦不求表襮退食輒手一  
編翛然吟詠自適而已君性故剛稠人廣坐每慷慨論時事意有  
不可輒斷斷爭辨聲色皆異不能以輒美悅人故拙達官勢交之  
助甲午庚子京師再亂守官勿去傷時感事一寄之於詩嘗太息



痛恨於當事者之誤國又以爲天下事非不可爲也則亟思有以自效顧爲資格所限久之始補工部虞衡司主事工部裁併改農工商部主事又久之始補安徽滁州直隸州知州而君已冉冉老矣會遭太夫人喪星奔歸里未及之官遽以歿卒鄉人士以君死孝請旌於朝遇國變遂格不行丁侍讀仁長序其詩謂宜援古人鄉謚之例謚以貞孝君之大節卓卓如此君少時好集唐句又集杜陵香山東坡放翁四家詩晚年所作益多汎濫百家不名一體若成誦在心借書於手往往如其意之所欲出論者比於黃唐堂香屑集存集句詩逾千首古來詩家所未有也著有漉雲樓詩存四卷集句十二卷以宣統二年庚戌終於里第春秋六十有二明年邁辛亥之變而君已前卒不及見矣十餘年來羣凶肆虐生人道盡使君而健在其椎胸裂眥當有什佰於曩時者余悲夫世變遷流恨不得如君者一抒其憤懣而又悲夫後死者之苟全於亂

世也嗚呼呻吟憔悴之餘孰與君之翩然長往一瞑不視也哉君  
子葆清葆鎮葬君於 之原爲之銘曰

積其憤鬱乃以詩鳴百家陶冶巧若天成纏綿忠愛芬惻性情幸  
乎唯孝大節崢嶸滄海揚塵豺虎縱橫翩然鸞鶴歸於太清風雅  
弗墜遺集眈眈述德鐫詞請視茲銘

李蘅甫先生墓表

余獲交李君滄萍因汪覺公覺公歿滄萍哭之哀時時展謁殯所  
余益重其人每過從輒出所藏書畫相與翫賞一日滄萍述其尊  
人蘅甫先生之行誼作而言曰滄萍家潮州豐順小勝鄉自明嘉  
靖至今四百餘年聚族千人先君以一諸生爲衆信服辛亥後杜  
門不預外事而於一鄉利病未嘗不惓惓也已已共匪難作所過  
侵掠廬舍爲墟先王父年高先君旣奉親僦居潮垣隻身走會城  
謀剿匪滄萍偕弟韶清乘間以避地爲請先君慨然曰吾鄉爲祖

宗數百年所留貽宗黨數千人所託命今若此柰何圖一身之苟  
免委棄之余誓以性命與匪相搏萬一不幸以至殞首死無恨汝  
曹當知我心也灑涕而行自是間關奔走籌鉅款募丁壯購槍械  
歸而督剿斃賊甚衆鄉人亦多被害先君屢瀕於危弗爲動三年  
而亂定先君爲文哀族中之死於難者旣乃招集流亡重葺宗祠  
創修族譜建橋梁道路力所能盡者無不盡也鄉事咸取決焉如  
是者數年先王父八十餘考終先君哀痛過情逾二年無疾而逝  
鄉鄰來弔者莫不悲泣不期而會喪者三四人野老村嫗膜拜  
相屬先君感人之深如此今棄養五年矣而墓石未立曩乞言於  
覺公應之而未及以爲竊願有請也滄萍言時淚承於睫聞者愴  
惻余不敢復辭抑滄萍所言實足以傳不朽余不能復贅也住者  
中興將帥若羅忠節公澤南劉武慎公長佑皆以諸生從戎勲業  
彪炳爲史冊光先生遭逢晚季不獲効命疆場僅得致力於鄉邑



之間有其才而無其遇論者惜焉然其志氣激壯足以風世而厲俗矣又嘗考明季遺老潮州耆舊有黃先生一淵者以保衛鄉里慷慨殺賊事蹟載志乘至今稱頌先生其繼美鄉先賢者歟先生諱杜衡甫其字縣學生祖諱丹桂父諱雲巖配陳氏子八人孫八人曾孫一人生於同治癸酉年 月卒於丁丑年四月年六十五卽以其年五月葬本鄉筆架山之原所著有萬松草堂詩文二十卷李氏族譜二十卷讀史紀要四十卷日記雜稿若干冊生平學行具載方君孝岳所爲傳茲不備述著其扞衛桑梓之功俾揭諸阡以式鄉邦而訊後世又使知先生遺澤在人宜有賢子以述其志也

二品銜候選道毛君墓表

光緒丙午余典郡山東獲晤毛君稚雲定直公仲子也定直公督粵先大夫在幕府司章奏君鄉舉與余同歲仍世交誼欣然道故

洎余守濟南提調省志局君參局事往還益習總纂孫京卿葆田  
與君世舊亦不以俗吏鄙余黃太守曾源後至余摯交也相與捧  
手懽若平生風塵邂逅中自詫有得朋之慶又私念此樂難常也  
辛亥余改官江西去魯甫數月而武昌變起天地崩拆海內糜沸  
余避地香港君走青島旋返舊居遂不復相見唯時時通問自以  
喬木世臣痛心國難太息於邪說之橫流綱常之毀裂憂憤迫切  
若負重疾今遺札盈篋距君歿十七年矣滄桑而後趨時之士希  
榮干進尋亦聲銷影沉甚至身名俱敗何可勝數君守歲寒之節  
不改其素顧費恨以終而昔年共事孫京卿早逝黃太守亦墓有  
宿草獨余以浮海之身倖然後死悲回惜往吁可慨也抑世變方  
大極於禍亂相尋罔知所屆君一瞑不視猶勝於呻吟待盡者已  
君諱承霖稚雲其字山東歷城人縣學生己卯優貢戊子舉人屢  
試禮闈不第援例以同知試吏湖北權德安府同知未履任投劾

歸以河工保知府遞保道員加二品銜山東通志局提調存古學  
堂監督廣仁善局局長鄉里義舉靡不盡力通志久未成書爲之  
補輯刊行續纂歷城縣志皆有功文獻壬戌大婚君集欸入賀

賞光德富義扁額晚歲閉門卻掃間從張總憲英麟柳太守堂遊  
居恒鬱鬱以乙丑年四月二十五日疾終里第春秋七十有三配  
高夫人前卒側室馬鞠姜子二熙泰鞠出熙頤姜出女三適張適  
孫適胡孫四人孫女二人葬於歷城 之原余少於君十年

夙致兄事之禮君得子晚歿時諸孤尙幼音問久闊比以書來求  
表君墓余喜故人之有子而益有感於數十年來治亂興亡之局  
與夫死生聚散之悲歎歎而不能已也於是泫然述舊俾揭諸阡  
以著君之大節其他燬行未能縷舉云

任仲新事畧

任文鼎字仲新號桂生本貫浙江會稽先代客粵久遂爲番禺人



父壽昌佐藩運兩司幕有聲於時文鼎少劬學好讀宋儒書常與蕭山朱啓連講論以名節相鏘礪屢應有司試不售納資爲直隸州知州分發福建權稅建寧值辛亥國變棄官歸束髮爲道士裝論及時事及人心風俗學術之敗壞輒歎不絕由是與世忤誓不出仕家本中人產亂後漸落與粵當事者有舊欲援引之嚴詞拒絕子廸任地方審判廳會計員擯不與同居人以爲過激弗顧也晚歲屢空倔強如故爲父母營葬不少懈最後得上元鄉之沙田岡以安窀穸而心力已交瘁矣戊寅避兵澳門以資斧不繼挈家歸甫一月而廣州失危迫間復走順德之烏洲鄉遘疾遽卒年七十有一妻幸前歿葬廣州大東門外蚡蛇岡亂定後歸君骨合葬焉子二人早卒孫一人彭年孤貧失學窮乏不能自存可慨也同里汪君兆鏞以詩挽之曰萍蹤不相遇之子念如何豈意荒洲宿忽聞蒿里歌淒涼皋羽髮沉寂魯陽戈萬感一時集空山老淚

多可以概其生平矣文鼎爲余婦第知之最稔因述其畧俾後之論世者有采焉

孝女洪存娟事畧

孝女洪氏名存娟其先安徽婺源人伯祖梅坪先生以孝廉肄業江甯鍾山書院捐修貢院考棚始占江甯籍父犀農先生僑寓鎮江遂爲丹徒人孝女幼聰慧解文字兼精女紅母胡病乳巖日久展轉牀褥孝女甫十餘歲朝夕侍左右始終弗懈母病亟刲臂以進猝昏厥稍間強起服勞如平日母不之覺也旣左臂及腕腫爛束以舊帛如巨木然私室中避人裹治其第詢之以傾跌致傷對固問之淚奪眶出母卒不治孝女泣告其第曰予誠不足以格天此身非所惜也母歿父益衰老病痰喘調護之事孝女身任之春秋佳日無喜容亦不以戚戚之色見於面夜則淚漬枕席間蓋終天之恨深矣尋以微疾卒年二十三歲祔葬於句容縣南鄉父墓

之右鄉人以孝行聞光緒二十四年奉 旨旌表

論曰刲肉療親律以毀傷之戒爲聖賢所不許懼夫激烈者之過於中也然人莫不愛其身使非呼號迫切出於萬不得已甯肯輕於自戕而或笑其愚且曰藉是以沽名焉則誠不諒之甚矣國家旌孝有常典割股傷生者不與獨疆吏以情入告無不仰邀曠典蓋不著於例者所以重人生其特予旌者所以表至性也如孝女者豈有絲毫求名之見及母病不起猶曰予誠不足以格天鬱鬱抱恨竟隕其生其志尤可哀也往洪侍郎鈞之姊事母至孝未嫁而卒新陽張星鑑爲作洪孝女傳孝女與之同姓又同以孝稱是足爲洪氏光矣

開齋文稿一卷訖



闇齋詩稿

番禺張學華

甲辰冬月遊羅浮宿黃龍觀

羅浮最幽勝我獨愛黃龍天半飛雙瀑雲均秀萬松故宮誰訪古  
深院不知冬道人言觀中冬暖夏涼招手問鸞鶴仙人何處逢

丙午四月出守登州吳子修前輩以詩送行依韻奉答留別

政垣同直諸公

臺省清華謫後知五雲回首舊曹司畧無籌策匡時拙尙戀承明  
去國遲二月初拜命領都同人挽留常入直四月方出都治似淮陽何敢薄才非玉局詎能奇河梁日

暮空惆悵人海蒼茫獨立時

東風一騎出京華此去蓬萊路未賒海氣連雲成幻市邊聲動地  
起悲笳功名誰復誇橫草登州多出名將戚武毅備光宗忠勤廣皆郡人茵溷甯當怨落花按藻天

庭公等在觚稜遙望赤城霞

原作

吳慶坻

賈董文章結主知 宣仁嘉歎畀三司  
殿頭怒虎騰聲早海角驅鱷掣尾遲瘠郡似聞民氣靜經生方見吏能奇遼關唇齒銷烽燧桑土綢繆在此時

聯茵接軫出東華帳飲匆匆別緒賒春老玉河晨折柳月明紫塞夜聞笳剷除豪氣須焚草辜負前期約看花坐嘯政成勤報最相逢重與吸杯霞

丁未歲朝寄黃石孫太守青州

春旂楊柳曉籠煙地近蓬萊得氣先秦碣舊題嘉德頌漢家新數中興年有懷鄉國書雲物無補生民愧俸錢邊郡於今求治急敢將坐嘯學前賢

小謫蓬壺話舊緣喜從東海共班聯勝遊倘許追京洛治行由來重潁川地接齒唇原互倚水流襟帶本相連何時來聽輿人誦同

上西樓望月圓

酬周立之 學淵

杼軸頻年賦大東近聞新政改元豐難回滾滾長河水空說泱泱  
表海風歸夢乍催芳草碧遊蹤尙憶輶塵紅昌黎薦士吾滋愧籍  
湜談詩興未窮

甲午鄉闈  
君出余門

原作

周學淵

羈宦頻年馬首東瓣香何幸祝南豐湖山瀟灑三齊郡車騎  
雍容兩漢風案上文書霜鬢白簾前官燭玉堂紅清時不作  
沈舟歎閱盡千帆意未窮

戊申六月石孫謁大府來濟小住郡齋十日瀕行照像誌別  
卽題其上

京洛相知久棲遲共此官十年身世感一室笑言歡薄宦飄零易  
浮蹤聚合難鏡中霜鬢影他日得重看



莫問誰賓主相逢慰我思篋中留諫草袖底出新詩風雨關心日  
濟垣苦旱日來始得雨湖山惜別時重來駐五馬休負故人期

和作

黃曾源

舊是霓裳侶中朝領諫官

余與君同入詞垣先後官御史

一麾先出守小聚此爲歡

余由徽州調青州守登州去年枉道相遇今移濟南屬區相招至六月始得爲十日之歡

宦拙藏身易時艱避地難

余守微時即思引退陳伯平中丞書以不

做官不能不做百姓歲月淹留不覺日復一日也

於齊非我志好月喜同看

傳書逢驛使一紙慰相思離索增余感清新愧讀詩人歸新

雨後

君函告濟南雨足即別余之日爲之少慰

夢繞落花時

君去年約歲首相見余欲過喧達至落花時節後

息壤還爲約君

休負所期

君約余來春重到濟南余亦要君他日遠揮別余於青州請以此言爲息壤可乎

湘潭中丞移節督粵瀕行奏保嘉獎余有愧焉賦此解嘲

坐理文書吏是師一燈猶似讀書時人生毀譽原無定宦海升沉  
已熟思久慣折腰慙靖節可能障面避元規貞元朝士休相笑檀  
作麒麟亦大奇

國計民生百未酬肯教俯仰逐時流幾經爨火成焦尾曾笑屏風  
誤觸頭野性豈堪冠帶縛粗材猶愧斗升謀年來臥閣徒虛負翻  
荷 明廷璽詔優

黃石孫文竹坪兩太守偕至濟南同遊千佛山日暮始歸  
宦海飄然一葉浮相逢舊侶喜同遊湖山旖旎真宜畫城郭蒼茫  
已入秋暫息征塵容放浪敢誇坐嘯擅風流春明往事渾如夢難  
得清談竟日留

李留庵丈惠寄相片并系以詩依韻奉答

一片閒雲懶作霖舊遊振觸十年心籃輿小住停花外畫艇低移  
繫樹陰圖畫識君身尚健鄉心撩我夢難尋青鞋布襪重相約莫  
使名山負向禽

原作

李啓隆

在山懷想出山霖珍重偏勞寄遠心多病及時需藥物不才

豈解讀碑陰澄清定止河流濁封禪親從泰嶽尋舊約勝遊  
遲蠟屐羅浮翠羽負仙禽

辛亥元日東石孫太守

瑞雪方占歲春風醞釀先喜逢元會日願祝太平年鄉遠心千里  
官閒手一編朝來簾閣靜吟嘯到花前

尚有同官樂深談夜雨燈舊巢阿閣鳳威望郅都鷹渤海人爭頌  
淮陽老不徵平生高世志莫謂愧春陵

石孫官諫垣直聲一  
時領郡後時有提志

遊龍洞看紅葉

冬日出郊局清遊意未倦古洞空追尋神龍不復見登眺倏傍夕  
物華猶可玩霜葉豔於花晚景更絢爛

輓孫佩南先生

葆田

循吏儒林並有聲當年風骨自錚錚冰霜歷盡人間苦誰與天公  
訴不平



翩然歸去謝簪纓垂老唯知手一經坐對湖山耽著述十年寂寞  
草元亭

頻聞優詔迂蒲輪一老歸然宿望尊苦臥寒穉終不起固知阿世  
薄公孫

百年志乘緝叢殘朱墨縱橫舊手痕今日龍門成絕筆東邦文獻  
待誰論

百喙爭鳴學說新空山誰識歲寒身坐看蒼舊凋零盡珍重楹書  
付託人

儒冠自古誤虛名况復狂流日日橫海內通儒今有幾不堪泚筆  
誅先生

陳香輪表兄假旋過濟流連話舊翌日同遊泰山

應官修五載冠帶日東縛岢巖望岱宗咫尺天風落同朝說蘇程  
舊遊溯京洛喜聞驄馬來相見幸如昨更得素心人同赴看山約

同遊有石孫太守

飈車快馳驟迎面見嵒嶸平明遂登山輒輿度巖壑蛇行路

巖巖

上山輿夫皆側身梯行

鳥飛雲漠漠秦松與漢柏劫火未消爍小憩觀飛瀑

危磴何年鑿誅蕩四天門重關如啓鑰我來凌絕頂眼界更開拓

一線伏河流數點隱城郭翹首呼蒼穹風雷倘可作始歎五嶽尊

坤輿富磅礴雲亭侈登封千載已寂寞碑碣偶流傳後人恣探索

凌晨攬衣起陡覺重裘薄徘徊望日觀不見金烏躍余與石孫輩起觀日出不見空濛

遠無際俯仰動心魄歸徑繞山後石塢斷如削巖棲愧島客英人某結廬山半耳

將八十步履猶健

揮手謝猿鶴經歲墮塵網纔識茲遊樂何當窮攀躋相與鬪

腰脚

移官江西將之都門石孫約同毛稚雲承露蕭紹庭應休方鶴

人燕年丁容之

兆德

周立之

學淵

置酒衙齋夜分言別并以詩

送行依韻奉答

宦海升沈已慣看浮雲聚散亦無端與君相見唯真氣此樂難常

剩墜歡晝裏湖山他日夢客邊霜露曉天寒平生解誦王晞語不  
羨人間作熱官

易進翻愁退轉難知交落落此同官已無鸞鳳巢阿閣空負鱸魚  
戴楚冠未必風萍能再合強持卮酒暫爲歡臨歧忍淚無多語唯  
祝加餐保歲寒

壬子初春得石孫青島來書作此奉答

端居鬱不樂尺書從遠來故人久闊別時事日淒哀浮生若蓬梗  
遁跡掩蒿萊誓欲謝人事何處避氛埃感君意良厚東望首屢回  
終負結鄰約懷抱向誰開春風不知恨安能起枯荄悠悠塵世事  
吾生已焉哉願君保歲寒莫惜鬢毛催何日從君去重尋劫後灰  
澹庵前輩見示近作依韻奉和並東章五珠垣

四序易周催歲晚百年難俟是河清江關蕭瑟詞人賦書卷飄零  
旅客情尚有禁方能活世似聞真隱早逃名相從啁唳還相慰莫



怨窮途偏仄行

爲陳子丹題趙千里畫

如此谿山足臥遊六朝煙翠坐中收  
評詩讀畫高人事合是元龍  
百尺樓

丹青高手老王孫細沈粗文未足論  
欲訪武陵漁父去更從畫裏

覓桃源

趙千里有桃源圖  
見庚子消夏錄

送陳鐵人前輩榮昌還滇

天運千年盡狂流萬派橫卷施心自苦  
精衛恨難平鳳羽韜光采  
鴻毛視死生祝君歸臥穩出處意分明

讀韋端已詞感賦寄石孫青島

慚愧遼東皂帽身天涯同是未歸人  
滿樓紅袖空惆悵縱有花枝  
不算春

坐看青山卷白雲游絲飛絮任紛紛  
桃花春水無窮恨每對斜暉

苦憶君

賀石孫生孫

書來新報鳳雛生  
乍試啼聲應更清  
見說傳家唯一硯  
知君意早薄公卿

塵劫茫茫海有桑  
移山癡願未能忘  
無因更得嘗湯餅  
愧我居然大父行

崇陵大祭禮成節  
庵前輩以餅餌寄贈感賦

仙餌分貽感舊恩  
餘生無分入修門  
當年曾拜紅綾賜  
回首東華似夢痕

橋山弓劍憶前塵  
金粟依然氣象新  
未得白衣陵下拜  
海濱憔悴泣孤臣

清明省墓

春郊士女踏青來  
芳草天涯節候催  
重過里門如作客  
未登邱壠

已生哀河山莽莽餘塚土今古茫茫話劫灰差喜松楸無恙在夕陽歸路重徘徊

山中跼足記當時落日蒼茫我所思未得表阡空有願便同誓墓亦堪悲他年埋骨知何地終古傷心說向誰城郭人民重認取不教猿鶴怨歸遲

上已

一春冷暖逐時遷細數流光獨悵然離亂更非天寶日詠觴重值永和年五湖鰕菜平生夢三月花鶯晚晚天擁被閑眠無意緒蕭蕭風雨斷還連

輓許稚筠宗丞

風雪漫天百感侵憐君獨抱歲寒心未能屈節辭官早卻爲憂時得病深藥杵敲殘鄉夢遠琴絃淒絕廣陵沈東華舊是同游地回首金門淚滿襟



當年武庫最知名萬里驚聞薤露聲東省簪毫成故事西山游展

負平生

張文襄曰政務處爲東省余與君同直約同游西山不果

耐官自守硜硜節

君爲榮文書館任同官多端漸變君獨澹然自守也

報國長懷

惓惓情曾是祝宗祈死志滿腔悲憤總難平

### 答蕭紹庭

燕臺落日冷黃金回首前游感不禁天末相望知己淚歲寒始見  
故人心浮家到處飄零慣填海何時怨悵深未有瑤華酬鄭重爲  
君重奏雍門琴

### 原作

蕭應椿

故人書至抵南金珍重開緘喜不禁忽憶前塵如隔世豈容  
今日負初心傍湖宅好歸無計繞郭山多買未深便欲刺船  
東海去移情重聽伯牙琴

### 除日九龍山人惠酥醪菜白沙鴨賦謝

春盤蔬果及時新乍喜分甘有故人領取山家風味足食鮭休道

庾郎貧

自分平生齟齬根感君厚意勸加餐仙家舊有麒麟脯莫作尋常雁鷺看

西山薇蕨萬緣休巾塵蕭閑百尺樓我愧中年聞道晚更無清福住羅浮

寄石孫并有懷容之稚雲紹庭立之

彈指匆匆歲又更百年枉說俟河清鶯花過眼都如夢塊壘填胸總不平落日寒潮羈客恨暮雲春樹故人情濟南朋舊多寥闊問訊煩君爲寄聲

猶記官齋夜話時結隣有約至今違浮蹤難合搏沙飯袖手相看敗局棋人事易催雙鬢改歲寒不負兩心知悠悠斯世吾誰與野史亭邊寄所思

次韻答許少筠見贈

故人歸臥幾經年得遂幽棲意灑然樓閣參差山作障煙波澹沲  
屋如船滄桑劫後知何世風月吟邊別有天且喜市塵飛不到茶  
香一榻夢痕圓

蕭瑟平生寄託深漫從塵世問知音奇書徧讀虞初集古調重彈  
賀若琴十載星霜迷鹿夢一天風雨作龍吟歲寒長抱冰心在冷  
笑隗臺市駿金

原作

許秉璋

京國分襟十五年光風重接倍泠然思鱸早返洪都節載鶴  
新歸粵水船治譜定教傳父老離懷仍悵隔雲天幾時再詠  
高軒過尊酒論文海月圓

年來鄭谷入山深荒徑登然喜足音塵海驚波餘白髮霜天  
同調託青琴劇談多記開元事招隱重賡左子吟從此雲龍  
徵逐便買鄰何用擲千金



少筠見示近作依韻奉答

叫斷荒山杜宇聲  
喜君心跡得雙清  
時從天外抒吟嘯  
不願人間識姓名  
花鳥飄零成昨夢  
風萍聚散悟浮生  
舉頭忍見山河影  
推卻殘棋局一枰

揮手雲中不可招  
空山真有爛柯樵  
淒涼漢殿銅仙淚  
寥落秦淮玉女簫  
旅燕辭巢飛不定  
冤禽啣石恨難銷  
天涯同是傷心客  
愁聽秋聲咽暮潮

原作

許秉璋

自喜幽居遠市聲  
風廊月榭有餘清  
竹林習隱還求侶  
蓮社談元已近名  
會與景陽賡止足  
休從思道論勞生  
滄桑歷後機心息  
閑到文楸舊弈枰

嶺桂巖松喜見招  
此身端合老漁樵  
縱懷今古三升酒  
舉目山河一管簫  
心跡久隨雲水淡  
爪痕都共雪泥消  
南窗慣作

羲皇想送盡流光任海潮

偕香輪同過少筠疊前韻

秋氣蕭然萬木聲  
竭來景物倍淒清  
漫吟叟以聲爲號  
游戲仙翻跛得名  
與世相遺彭澤老  
含情有託玉谿生  
高窗臥起風初過  
吹落松花滿石枰

空谷幽蘭爲我招  
振衣躑躅一山樵  
何時真得師黃石  
是處猶聞倚玉簫  
庾嶺看梅詩夢遠  
離亭折柳酒痕消  
白雲重訪高人宅  
歸路斜陽送落潮

少筠惠牡丹花賦謝

百寶欄中護絳霞  
天香分到野人家  
自憐郊島多寒瘦  
慙對春風富貴花

長安霜雪洛陽塵  
不信年時尙有春  
翻向空山誇絕色  
桃花未羨武陵人

乙卯元日

春光不解爲誰妍獨臥空山雨雪天曉夢驚回殘臘後芳尊辜負  
好花前南飛何處棲烏鵲北向潛然拜杜鵑賸有匣中心史在一  
編私署景炎年

桑海遷流已幾經此身敢復怨飄零蒼茫故國雲中樹寥落知交  
曙後星偶爲題詩撩舊恨未能耽酒怕長醒年來愁閱興亡史又  
報春風到野亭

少筠惠鰓魚賦謝

熟梅天氣晚晴初柳葉新穿尺半魚領取三鯨鄉味足從今不羨  
四鰓鱸

分得銀鱗入饌新蜀薑吳豉伴芳辛當筵且莫愁多骨慚愧平生  
肉食人

讀明代遺佚傳成絕句百首卽書其後



一回開卷一潸然歌泣無端亦自憐故國歸魂空化鶴荒山啼血  
又聞鵲鬚眉想像如生日意氣消磨未死年同是茫茫身世恨願  
求奇節似前賢

中秋和少筠

燕去鴻來歲月頻海濱同此寄閒身曲中白雪甯諧俗夢後黃梁  
尙累人塵却已看棋局慣端居偏與藥鑪親瓊樓玉宇今何夕愁  
倚闌干望北辰

與九龍山人同游青山宿盃渡寺

十年魂夢憶羅浮海外重來作勝遊曲磴千盤松石古遠山一角  
竹亭幽巖花澗草皆仙氣酒榼詩囊盪客愁未得結茅終隱去曉  
天如畫送歸舟

丙辰元日

春風依舊到吾廬抗首長吟興不孤花鳥向人猶旖旎雲山如夢

總模糊兒童笑樂還簪勝鄰舍懽呼正得盧莫問義熙何甲子但須強飲學屠沽

和作

陳伯陶

春光撩我拂蓬廬歎息龔生調太孤新室元年驚瞥過

新莽始建國元年以

十二月朔日爲元旦

漢家臘日敢含糊

去歲歷書或以爲有三十日

傳聞角上爭蠻觸悶煞盤中

有雉廬獨坐無聊須一醉屠蘇酒盡且重沽

曾記承明入直廬觚棱回首夢魂孤文成賀歲階前進

丙午元旦余直南

蕭雲從實歲表與諸公同進

帖賜宜春座上糊

乙巳除夕蒙賜延福受祐四字春帖

一自落花飄糞溷那堪

啼鳥勸壺盧歸休苦憶斜川老

淵明游斜川詩開歲修五十吾生行歸休

深谷逃名未許沽

元日雲林小集感事有作

屠蘇飲罷意無聊故國音書久寂寥大地龍蛇猶戰鬪漫天風雨

正漂搖碧雞萬里傳烽火白馬千年湧怒濤今日旌旂非漢武道

人休話劫灰消

時滇南方有兵事

立春日小雨厲道人以詩見示仍疊前韻奉答

風雨瀟瀟半啟廬韶光催換客懷孤  
青山許我爲巢隱黃閣何人笑紙糊  
世變那能知魏晉詩名甯敢擬王盧  
蓬萊淺後休回首一盞春醪就市沽

原作

陳伯陶

雨氣濛濛黯敝廬清吟難遣客懷孤  
雲橫遠浦燈猶出風襲幽窗紙半糊  
並世喜隨東野孟閉門聊效玉川盧  
遙知仲蔚蓬蒿徑滑踏春泥酒更沽

春日寄懷石孫并柬劉幼雲學部

亂後身如寄天涯歲又新空山愁望帝  
遠道苦懷人雲樹蒼茫日鶯花黯淡春  
萋萋芳草色爲客倍傷神

大地猶烽火吾廬自嘯歌不知王氏臘  
誰挽魯陽戈蕉鹿迷離易荆駝感慨多  
更生封事在撫劍意如何



松庵以長歌見贈奉答

先哲昔垂訓忠孝爲大原雖在極亂世名教赫然存近自異說興  
道德破其藩中風且狂走有若萬馬奔冠冕輕毀裂震撼危乾坤  
不有毛裏愛肯念顧復恩溺人甚洪水惻怛驚心唯魂君屹中流  
學海窮淵源憶當弱冠年獻賦叩帝閭是時值承平著書太乙垣  
從容侍講幄啓沃累萬言上者培國脈下思惠黎元金鑑良在茲  
持是答至尊平生復耐官要路絕攀援五噫辭漢都甘乘下澤轅  
歸來侍庭闈載詠北堂萱硯耕代祿養定省勤朝昏以此樹風教  
庶幾薄俗敦鄉里日不靖治絲棼益煩更值風雲變遂令波濤掀  
恨無魯陽戈再見扶桑暎避地奉板輿強作笑言溫老萊能兒嬉  
有酒喜盈樽長使太和氣靄然萃一門我愧驚鈍姿往者隨鸞鶴  
几席屢追陪文字同討論哀職百無補海邦忝乘軒仕宦未十年  
世事覆又翻年時竄窮島誓欲謝塵喧自分若枯蓬葉落不歸根

感子纏綿意相愛如第昆近喜比鄰接海外桃花村但願爲蛩蛭  
甯復羨鵬鯤春明一回首往事如夢痕黍離與麥秀欲歌聲已吞  
何時理松菊從君歸故園

奉訊貽公覺公澳居

年年漂泊感風塵猶喜音書問訊頻赤手更無撐拄望白頭同作  
亂離人歲寒松菊荒三徑世外桃花各一津曾是鐵橋遊憩地好  
將姓氏訪遺民

明清民張穆曾遊澳門時  
粵人避亂者以爲樂土云

待月同松庵

索居每簡出欣然得儔侶清夜約同遊相忘在羈旅浮雲蔽明月  
蒼茫共延佇倚樹且徘徊此意與誰語

同作

丁潛客

沈沈鐘漏靜杳杳煙樹晚鄰翁呼我出意行無近遠好月期  
不來蒼茫隔雲巘比似訪戴人更携餘興返

菽莊主人以黃牡丹菊徵詩作者千人少筠得牡丹狀元置酒觴客賦此爲賀

白酒黃花集主賓喜君標奪洛陽春詩題韓圃香留晚裝學姚家妙寫真聲價共知崑玉貴才華誰鬪色絲新故鄉豔說蓮鬚閣風雅於今有替人

重陽日與次嚴少筠季裴伯端叔文太平山頂登高

佳日登高覺眼明雲巖飛度筍輿輕往來一路渾如砥始信山名是太平

小立風前帽影欹游人不斷夕陽時黃花莫笑顏顏老便折幽香欲贈誰

九月十七日宋遺民趙秋曉先生生日九龍真逸集同人於宋王臺畔設像拜之賦詩爲壽次秋曉生朝觴客韻

海風吹斷雲中槎幽人來往空谷遐躡衣徑去餐流霞龍湫井水



嘗新茶飄零難問帝子家陵谷遷移風雨加紛紛豺虎方磨牙世  
外尙有碧桃花再拜待獻安期瓜神旂逶迤降寶車蕙肴椒觴揚  
芳華城郭千年歸路賒

和香輪

稀社徜徉日秋光晚更佳菊花開老圃木葉下空階物外機心息  
尊前倦眼揩筇輿歸路近風雨故人偕  
鄉國易爲別煙塵望不清難回天北轉漸見道西行避世求真隱  
逢人怕獨醒青山曾有約猿鶴解相迎

清明省墓感賦

昔年營葬虎爪岡墓前有餘地頗足展拓且爲他日祔葬  
之計索值千金未能售也今歲清明省墓則新塚纍然矣  
人事乖迕夙願不償感賦斯篇爲之隕涕

人生無百年荏苒駒駛隙自經喪亂來已過五寒食惻惻游子懷

萋萋芳草色東風催我歸  
乍歸仍似客入門裝甫卸  
俯仰念先澤去年祀事缺  
烽煙苦未息呼嘯聚萑苻  
跬步愁荊棘痛定曾幾時  
路人猶悚惕比方解兵爭  
尙聞戒行役誰無報本思  
奔走途爲塞驅車出北門  
望見松與柏春露感于心  
先壟徧登涉迺邇歷虎岡  
往者營北域佳城氣鬱蔥  
吾親安體魄足幾經年辛  
苦牛眠覓廣袤僅尋丈餘  
地猶待闢方期萬家守詎  
惜千金值寧知人事改陵  
谷多變易誓墓旣自悲表  
阡竟未得新塚何纍然豐  
碑在其側雖幸坏土完頗  
嫌鄰壤逼劬勞百未報艱  
難感疇昔長願千秋後相  
從傍泉窆定省庶弗違幽  
冥豈終隔如何夙志乖空  
山怨荒寂夢中忽痛哭涕  
淚沾胸臆驚寤一燈熒淒  
涼風雨夕

題覺公清谿漁隱圖

江湖隨處足幽棲重理殘  
縑認舊題但使滄浪容嘯  
詠不須更羨武陵谿

黃冠歸去迹飄然落日蒼茫一釣船  
畫裏谿山勞夢想水雲心事若爲傳

眼底滄桑恨不禁江潭有客獨行吟  
百年誰謂終難俟地老天荒一片心

風景山河故不殊此身如入輞川圖  
扁舟倘得從君去我亦煙波舊釣徒

辛白六十生朝追憶舊遊賦詩爲壽

我年弱冠識君名深水潭邊早有聲  
卅載同遊零落盡滄桑回首不勝情

並轡來尋帝里春蹇驢風雪素衣塵  
江東名重羅昭諫曾是當年下第人

几席相依又一時廿年蹤跡隔天涯  
重來池館猶如昨不見婆娑萬柳絲



賓客平原重魯連，狂名一任世人傳。  
剛從草罷軍書後，醉倒牙旂玉帳前。

紛紛富貴笑浮雲，白眼看人酒半醺。  
莫怪灌夫輕罵坐，一錢不值漢將軍。

繞床袒跣叫呼喧，一局輸贏莫更論。  
興到便思山谷語，手談勝與俗人言。

蘿洞年年負勝遊，記同李叟話風流。  
萬梅樹下花如雪，應笑吾曹盡白頭。

萬里歸來感不禁，猿啼寒谷鳥投林。  
固知漂泊皆前定，手把君詩一再吟。

辛亥夏歸里，君贈詩有猿啼寒谷悲前侶，鳥宿風林怯故枝之句，不謂遂成詩識也。

年時遷徙不辭頻，海外桃花尚有津。  
曾與比鄰約雞黍，自憐猶是未歸人。

梅花十月喜開筵，往事依依在目前。  
莫惜詞人今老大，爲君重唱

李龜年

石老寄詩見懷奉荅二首

滄海頻年客湖山跡久暎鬢華霜染鏡心事絮沾泥漂泊生如寄  
榮枯物本齊強將歸計理聽罷子規啼

別後長相憶天涯感故人從來耽寂寞底用慰沈淪世豈堪多難  
吾猶患有身靜觀還自悟百事委灰塵

丁潛庵前輩以太夫人生朝置酒見招賦此爲壽

人生大節孝與忠出處或異道則同末流藉口爲親屈翩翩綵服  
徒爲容豈知教忠本慈訓貞筠晚勁凌嚴冬但營菽水足榮養不  
夸於外由中充往者朝陽謝鸞鳳况乃東海回颺風歸來晨夕博  
歡笑瑞氣長靄門庭中壽母九旬兒六十依戀膝下心猶童天其  
錫爾以純嘏至孝所感呼吸通誰謂河清不可俟堯衢歌舞春融

融

庚申元日

歸來一室亦翛然彈指匆匆歲序遷已悟筋骸非少日漸看髻  
入中年逢人莫訝周旋懶避世甯辭意氣偏只與陳編閑料理不  
愁風雨正連綿

曹大滋田新築晴雪廬爲消夏之約因題長句奉贈

何年拄杖羅浮去縹緲仙蹤鎖煙霧勝遊咫尺青山頭隔斷塵凡  
得幽趣是處依山可結廬移家便向山村住海色蒼茫正對門雨  
中帆影雲中樹橫流徧地無乾土別開世界清涼處疏泉疊石范  
寬圖飛霜積雪張融賦廬外鹽田一片如雪知君棲隱有真樂高歌更得江山助  
我亦煙波一釣徒舊盟回首呼鷗鷺平生想像武陵源春水桃花  
遲喚渡他時雞黍話流連莫問滄桑會幾度

題熙文貞王文敏書畫合卷爲黃遁僧

長安城頭烏夜呼舉朝將相走避胡司成觥觥表大節激昂慷慨



同捐軀烽火倉皇眼中見十年更值滄桑變風流零落在人間剩  
有鵝溪兩幅絹從來聚散如雲煙到手喜看珠璧聯仿佛坡翁與  
迂叟書畫皆以其人傳知君藏此具深意題罷歎歎更不置當時  
我亦困危城覩顏偷息真堪愧

題默公春心圖

杜鵑叫斷聲鳴咽化作春花不堪折披圖再拜淚沆瀾不知是花  
還是血淒淒風雨送春歸未應長與東風別百年有盡心無窮便  
教化碧終難滅

蛻農居士爲族姪孫女作張貞婦傳敬題其後

我家京口五百載女教世守儒門風煌煌譜牒具可攷禮法不讓  
郝與鍾 國初門第稱極盛祖姑刲股表至性

姑病均載鎮江  
府志節孝傳

字許字李女守貞

十二世從祖宏章公女字許十四世  
族祖紹儒公女字李皆未嫁守節

綽楔後先互輝映清

風弈葉今猶存松柏勁節凌歲寒家庭奇變不忍說遑計身後長

埋冤時無皋蘇能斷獄鐵案如山輕反覆手持三尺者何爲坐使

奸人逃顯戮行路悲傷况宗親發憤徑欲巫咸陳

辛亥返鎮族姪繼家以訟事告余爲代陳當道時尚未定覆檢

之議也

六月霜飛黯天日覆盆終古誰爲伸蛻農居士奮史筆出入毫

釐細剖別賴有清議扶綱常搗麝留香香逾烈海水可枯石可爛

貞婦之名不可滅

### 題江瀛濤道士聽松圖

圖繪肖像二對立松石間黃香石題云身外有身誰假誰  
真別有天游釋形謀神覺公逋老皆有詩余亦和作

孤松徙倚一髯仙雲水翛然絕萬緣塵世無人堪作伴只應我與  
我周旋

誰從阿堵爲傳神幻相何須辨假真我欲與師參一語一身已贅  
况雙身

許苓西以所作遊荔灣詩書扇見贈和作

酷暑亦知無避處欲傾海水滌塵煩徒聞荔子催開宴不信荷花  
解報恩廿載題襟詞客老一帘沽酒市兒喧重來勝地低徊絕風  
景山河忍復論

悼亡

人生朝露尋常語豈謂尋常語便真歷歷眼前歡笑共可堪一霎  
委灰塵

共苦同甘四十年閑官冷落舊青氈浮名枉說蓬萊近夢憶長安  
雨雪天

熊幡多節並相隨辛苦頻年一展眉驚地驚波無淨土卻來漂泊  
在天涯

少君紈綺自高門刲臂當年舊淚痕

夫人侍父疾嘗  
刲臂和藥以進

朝市已非人事改西

華葛帔不堪論

浮生蹤跡怨飛蓬羈旅情懷又不同誰料更占炊白夢歸纔五日



太匆匆

明知哀樂亦無端  
薤露歌殘淚未乾  
我欲與君同解脫  
只愁煩惱拔除難

過陳香輪表兄墓

此地堪埋骨  
名山傍昔賢

墓與程清獻公祖墓接近

臨邱遲一慟  
宿草已三年  
往事

成追憶  
浮生感變遷  
諫書猶在篋  
重檢更淒然

惟香姪以君奏稿屬校未竣

秋感

誰憐室邇此心遐  
一夕西風感歲華  
尚有淚痕凝獨枕  
更無消息問靈槎  
浮沈斯世身原贅  
想像平生夢亦賒  
莫更團圓望明月  
已看憔悴到梅花

新植梅一株憔悴欲死

答黃石孫

鵲啼蜨怨淚痕新  
眼底流光又一春  
憔悴黃冠早出世  
輕舟不倩挂帆人

辛酉中秋

去歲愁烽火匆匆襖被時亂離猶共守倉卒竟長辭難定來生事  
徒令後死悲思量同穴近未必九原知  
怕說逢佳節思君淚泫然乍驚秋又半不信月猶圓煩惱難成佛  
蒼茫欲問天白頭懷抱惡悽絕一燈前

題覺公廣東元遺民錄

一朝色目儒冠賤羣盜縱橫士氣孱猶有孤蹤成獨往幾人爭羨  
白衣還

尊王大義炳春秋邪說紛紛總謬悠往事低徊柱厲叔敢於君父  
論恩讎

落日空山泣杜鵑傷心猶記戊申年乾坤正氣風雷壯卻怪梨洲  
論亦偏

臨清狷潔冠南園諸子觥觥大節存名字千年光嶺海一編纂錄

續篁墩

苓西以初夏詩索和卽步其韻

夢入華胥叩玉京  
悵悵庭院午陰清  
掃除俗事書還讀  
收拾雄心劍不鳴  
倦蜨已迷芳草路  
殘鴉猶戀夕陽城  
鈞天廣樂吾能記  
說與人間未解聽

六十述懷

悠悠六十歲華遷  
振觸前塵一惘然  
老去嬾編長慶集  
歸來猶是義熙年  
半生出處成何事  
萬劫乘除信有天  
早辦青山埋骨地  
不應留眼看桑田

浮生誰與百年期  
枉說澄清尙有時  
歲月幾曾堪把翫  
雲山重認祇迷離  
極知身在徒爲累  
已病神傷強自支  
我是頑仙行謫滿  
空山且誦大還詞

覺公寄示歲晚詩依韻奉荅



天風遙引水潏潏滄海驚波百不關知有舊遊題歲月豈無歸夢  
繞家山浮雲蒼狗蹤如幻臘酒黃羊興亦慳元會喜逢新甲子躋  
堂獻賦待公還

種蘭荅潛公

芳蘭忌當門往往闕空谷竭來庭宇間晨夕伴幽獨久飫膏露滋  
卻畏驕陽暴矧茲火益烈頗怪天何酷墻隅暫棄置甘受泥塗辱

蘭性畏日置檐下者經  
月近始支棚以避炎暑

累月勞經營縛茅成小築擢秀許升庭得蔭如張幄  
轉移賴人事靜觀理亦足種花解花意榮悴寧徇俗平生有真契  
抱節偕松竹所期保貞操羞與凡卉逐國香要自貴終當被熏沐  
乍逢騷客來入室愛清馥對花別有悟無使兒輩覺

覺公寄示題君子泉詩奉和二首

悵望天涯一水盈舊遊回首最關情疏泉鑿石饒幽趣隔斷塵凡  
分外清

風景流連海外天間徵故實續新編君有澳門稿詩徵引故實甚詳從知詩客留題後便是東坡白鶴泉

石孫以月下見懷詩寄示依韻奉酬千里懷人可勝悽黯

劫後浮生草草過更堪兵氣滿關河勞君問訊增惆悵地老天荒竟柰何

故交餘幾尚依然萬里飄零各一天怕對蒼茫舊時月照人離夢到愁邊

偶檢得五兄手札悲不自勝作三絕句

烽火年年避地頻白頭兄弟倍相親乍歸幾日長埋恨憔悴空留後死身

卅年學道怨蹉跎

來札言三十年前曾從四川鄧先生習道終以奔走吏事因倦未果近復入同善社與鄧所傳無異也

夢入瑤京舊侶多

兄又言夢

至一處有人贈以一聯有羽化登仙之想意甚欣然

老養谷神原未晚庚丁有識柰君何

十年前兄在西村呂純陽廟得乩示詩云十年宦海寄遯蹤

跡蓬飄又幾秋寄語庚丁須捷足天河有路買歸舟年來調居香港病後匆匆歸來竟於丁日逝世事有前定悲哉

回首平生百感侵連床風雨渺難尋唯留一段傷心話重檢殘箋  
淚滿襟兄札言學道成仙固未可期邵病延年則可必得力勸余入社不料其竟以此得病也

丁卯正月十三日歲寒堂宴集

風波不到歲寒堂猶夢鈞天饗帝觴耿耿寸心成獨往沈沈一髮  
幹微陽誰曾下土懷桑椹且與空山飽蕨香多感相知意忠厚白  
頭珍重荅春光

題張豫荃明代千遺民詩

赤棒緋衣喋血盈百年士氣尙崢嶸相從不止田橫客猶許人間  
識姓名

空山風雨付銷沈獨抱蒼茫一片心碧血千年終不滅翻從異代  
結知音

間搜野史幾欷歔懷古傷今託意微賈島詩成還設祭故應同薦  
北山薇



空谷登音喜不孤行吟我亦託江湖一編尚記留殘稿卻愧詞家

大小巫

往在香港偶錄明遺民小傳系以絕句得百餘首  
丁潛客前輩題曰采薇百詠不及君詩十一也

登公贈嘉應子賦謝

酸鹹嗜好豈人殊不數南楊與北盧何異木瓜投衛國倘同橄欖  
賦吳都老夫細嚼甘回舌稚子譁爭笑挽鬚欲續宛陵酬贈興較  
量風味似渠無

題李樹人生壙圖

身世茫茫任去來青山遲我白雲隈他年誰表詩人墓認取松杉  
手自栽

八方無地可埋憂便欲相從世外遊畫出中條山色好倘携詩酒  
爲君留

潛公遺集刻成感賦四絕

早歲辭榮晚致身力扶名教有完人卻將家國無窮恨寫入詩篇

泣鬼神

一代詩家面目存但憑格調莫輕論  
谷音獨有錚錚響不落風塵  
體自尊

故國平生感念深瓊樓高處獨沈吟  
靈均發憤成天問想見斯人  
鐵石心

東華舊夢尚依依海外同遊又一時  
今日淒涼悲宿草淚痕和墨  
點君詩

題陳伯任沙亭訪墓圖

有明晚季盛節義南州士氣尤激昂  
沙亭道人鬱奇抱彫龍變化  
雲端翔忽儒忽釋忽冠帶遠遊五嶽浮三湘  
歸來羅浮恣吟嘯九  
歌祖述荃蘭香人間贈弋渺高舉井中心  
史沈幽光欲求遺書晚  
始出故壟安得圖經詳平生馬革志未遂  
萇叔碧血千年藏首邱  
得正詎所計魂魄長依父母旁  
宿草淒迷誰復識塵劫幾換悲滄

桑四碩人墓距百武舊題片碣都荒涼精誠曠世若有感問俗重  
過通德鄉爲營封樹禁樵牧死士豈不如生王固知潛曜久必發  
大書深刻詞煌煌入泉亭下拜遺像松柏交映鬚眉蒼故人倘憶

陳獨漉祥雲高處遙相望

獨漉墓在番禺虎步司祥雲嶺見龍山陳氏族譜

題桂皓庭先生素服尋山圖

禮教慎終始達識齊死生蜉蝣亦偶寄鳶蟻寧足驚顧茲曠土懷  
難慰人子情劬勞豈云報長恐負幽冥葬者承生氣斯理本至精  
所求安體魄非爲俗說熒丈人儒林宗明發懷風誠豈然空谷中  
形瘁神則清大孝天所佑葱鬱真佳城宰樹保世澤喬木垂家聲  
賤子昔營兆寒暑會屢更往事尙堪憶跼足愁修程披圖增感慕  
百代留芳型

伯魯見示近作賦荅

頻年浮海怨歸遲敢信澄清尙有期蠻觸可憐爭未已更無人肯



念瘡痍

眼底波雲幾變遷  
萍蓬蹤跡解相憐  
白頭自分長漂泊  
浩劫寧當更怨天

憔悴猶爲澤畔吟  
空山獨抱歲寒心  
淒涼身世從誰訴  
留與他年續谷音

壬申七十初度

平頭七十古稀年  
住世因循亦自憐  
心死已知身是贅  
早衰豈意晚能全  
醉吟咄咄今何日  
夢想非非別有天  
欲讖浮生歸淨土  
萬緣滅後見真禪

十一月十二日訪堦公龍山夜宿杜鵑庵望月歸後卻寄

羅浮約難到來訪  
歲寒盟喚渡日向夕  
有客導我行

是日晴雪  
公同行

晨叩故

人廬執手話平生  
自從喪亂來懷抱爲誰傾  
深譚動淒哽高睨猶縱橫  
空谷抱春心寒燠候易更

歲寒登舟  
到後樂坂

大化自潛轉霜霰詎足驚夜

半攬衣起池平月一泓俯仰託遐想萬里共澄清瓊樓夢何處悠  
悠阻修程期君挾漢手更上閶風征太虛本無滓天宇盪空明幾  
時月當頭重見三五盈暫別願努力歸路雞初鳴

張豫荃寓廬落成寄詩索和依韻賦荅

家世煙波狎老漁滄江晚臥感離居橫流真恐能沈陸小住無妨  
且結廬遼海皂巾名自重稚川丹竈願寧虛閉門何地非箕穎天  
與安閒爲著書

絡繹詩筒動隔旬蒼茫劫後託吟身高邱流涕今無女空谷登音  
古有人瓊闕定知縈舊夢玉淵猶望起潛鱗寓形會得淵明意不  
賦歸來亦絕塵

覺公登公約蘿岡探梅覺公詩成索和賦荅

蘿峯水石幽東塾昔有記洞口萬梅花香雪遠無際舊遊逾廿年  
坐閱浮雲逝故人悲零落餘生感憔悴獨有汪水雲一老靈光歸

王雁伍道人殷勤屢招致相携勝日游  
陡覺凌風快迤邐歷郊原  
風景數殊異探芳惜已遲連塍花影碎  
但能慙幽賞何必鬪綺麗  
山徑曲數折巖石時一憩望塵羨先登  
舉步愁後躡曳杖姑徐行  
捫蘿亦能至幸無俗客嘲喜共癯僧話  
麤蛇解相憐老僧號愚足疾與余同病  
諒不怪桑下覓陳迹遷流今何世緬想承  
平年耆舊風流在吾衰  
倦攀陟不見磨厓字歸途漸向暮遠山  
尙如畫咫尺弔詩魂寒泉  
未親酌諸公興不減預約重啖荔願歌  
七發篇清遊倘能再

孟晉中丞將爲粵遊以詩見寄奉和二首

廿載相違世局更白頭衰鈍愧餘生  
空留老眼看殘劫尙抱癡心  
望太平呵壁已無天可問迷陽方歎路  
難行近來足疾艱於步履  
喜公腰脚今猶健萬里春遊正快晴

歌哭茫茫歲又新飽經霜雪亦回春  
淒涼家國成今古瀟灑湖山  
孰主賓老去漸傷流輩盡書來彌覺  
故人親潁川太守知相憶同



是飄零亂後身

石孫太守時  
時以書存問

送孟晉中丞返滬仍用前韻

乍見蒼然鬢髮更殷勤道故慰平生逃虛久已音塵隔學道方期  
意氣平鵬鷗互飛甯可耦鸞蛇相語各能行珠泉回首悲陳迹會  
記詩賡瑞雪晴

辛亥同官樸垣元  
日得雪各紀以詩

蠻觸紛紛百感新可憐大地更無春瘡痍誰起溝中瘠談笑猶聞  
座上賓

公到粵爲  
義舉務

白首故交難遽別青山舊夢最相親西湖風月應如

昨倘著吟邊偃蹇身

與公爲西湖之約開方  
結廬湖上倘能終隱也

題崔伯越高齋行鉢圖

佛教本平等何者爲榮辱崔侯慧業人塵鞅謝追逐香火結夙因  
短檠几猶伏平生甘淡泊半菽日已足慨然念出世一盂啜僧粥  
未煩乞米帖且續傳燈錄高坐黃面癯羣神具尺幅會持衆香鉢  
供養同尊宿

偕月溪上人覺公定公白雲酒家小集和月溪韻

曖曖孤雲卷碧空廿年蹤跡掩蒿蓬  
逃虛有託遊方外聚幻無端  
入夢中照影恒河餘髮白棲心巖壑隔塵紅  
因師問訊騎驢叟

諸人

前待約羅浮訪葛翁

豫荃歸粵賦贈步覺公韻

故人相見古稀年且喜靈光獨巋然  
著述差同王伯厚感懷休比  
杜樊川黃庭妙悟談元訣丹竈閑搜抱朴篇  
愁說夕陽城郭改永嘉離亂剩殘顛

題余樾園浮山勝概圖

羅浮號南嶽作鎮炎方主兩山相鈎連  
化工巧綴補後人志浮山  
勝境歷可數自從分霞嶺屹立成門戶  
拓勢石樓聳橫空鎖橋柱  
迤邐三十里岬然闢仙府北庵昔講道  
鸞鶴下壇宇縹緲望三峯  
煙雲互吞吐茶山景幽絕巖谷更深阻  
亦有梅花村縞衣翔翠羽

神山何必遠塵凡，隔幾許筇屐多。未到無怪嗤黃土，張謝甫結真契響泉。憇別墅畫稿，悟雲林樹石，皆入古今。復披此圖臥遊，得快覩舊夢，重追尋奇想，欲冲舉何當？向雲中問訊蓬萊侶。

漱珠岡楊議郎祠看梅花同汪覺公桂南屏冒鶴亭

小港看梅花，花時遊客盛。寥落廿年餘，無復尋芳興。漱珠屹在望，樹石最幽夔。昔聞楊議郎，手植松成徑。殘塲野叟得，故宅詩人詠。雷塘始建祠，壇宇互輝映。青來老道士，孤抱耽清淨。因山構幽居，幾曲疊蘿磴。愛此一壑專，天然具深靚。何年結梅社，不負歲寒盟。訪古客同來，探春誰可贈。數點南枝雪，風格高士稱。名蹟攷里乘，應較蘿峯勝。擬仿鑄玉屏，歸路日未暝。

元夕偶成

歲月催人又一時，流光何速我何遲。放燈故事猶能記，攬鏡衰顏祇自知。老去輩流尋向盡，劫餘身世動增悲。十年前已題員石荷。



插劉伶恐後期

余營生機形家謂今年方向最宜過此復多拘忌劉伶死使埋其墓深可念也

### 章一山廬舊京爲十老會寄詩徵和用原韻

南湖耆舊會中人

明高宇泰舉南湖耆舊會值項漢民植有可議者弗得入共得九人乃迎李梅岑爲第酒合十人見全湖山詞海序集

白髮相看劫後

身故國尙傳天祐史

五代史唐七十二年江南仍稱天祐

幽居同是義熙民未妨皂帽長忘

世肯使緇衣易化塵汝社風流滄海夢幾時重見帝城春

丙子閏三月十日羅浮蝶見於覺公東軒至是凡三見矣爲

### 作長歌紀之

羅浮胡蝶仙所遺麻姑裙與葛翁衣嶺南詩人屈陳梁三家集中

各有詩百餘年來漸沈寂有似鳳鳥見者稀黎謝里山黃並好

事亦未刻畫到仙姿水雲居士抱微尙屏跡久與世俗違前年齋

頭蝶兩見七日巧值朔望期去年蝶繭復携致自秋涉春逾三時

初如雲衣蘊奇采倏若霞帔揚光輝凌晨快靚走相告雷雨啓蟄

氣感微神物狎至古希有仙心默契今奚疑長蘆再見已自詫未

若君家尤瑰奇尙餘雙繭倘並出更問莊老誰雄雌肯留信宿待  
描畫色相偶現人爭窺固知塵網難久羈故山會有仙人騎翩然  
來去皆天機

### 輓吳澹庵

世劫今頻換交情老更親題襟餘幾輩砥柱失斯人安定門爭附  
河汾道未淪笛聲催夢急淒絕斷音塵

全用君病歎累起往視夜半忽傳噩耗竟未知也

澹泊存吾素浮沈任客嘲并函心孰喻鄉獻手親鈔遺稿留光燄  
餘生感幻泡相知慚獨漉強爲狀金茅

吳金茅與獨漉爲兒女姻親金茅卒獨漉爲作行狀君門人雖秋園梁雨霏均以爲請晚未定以傳君也

### 冒鶴亭遊羅浮有詩見懷奉荅

洛下才華早擅名羅浮吟卷思逾清江鄉往昔傳謳頌湖海年時  
感死生

來詩及鮑蛇農黃石孫兩太守皆余舊交

鷗鷺可招還共語夔蛇相惜各能行知交累代

### 滄桑換重喜詩壇有繼聲

丁丑七月避兵香港寓薄扶林覺公寄示南灣晚眺詩依韻

和作

日日驚濤珠海灣誰從忙裏意猶閒  
側身無地真沈陸被髮何人竟入山  
烽急頻聞鳶有信天空獨羨鳥知還  
廿年重踏經行路白髮飄零換舊顏

瓊樓高詠感蒼茫夢落江湖路阻長  
劫後全翻棋黑白天邊愁見血元黃  
誰云魚爛猶能國自笑鷗浮便是鄉  
何日相從過僧院不

辭三宿話滄桑

君書來約遊  
普濟禪院

豫公避兵移家寄詩索和依韻奉荅

萬松深處故鄉園長憶山中鶴與猿  
憂患屢經知道力風波不到卽仙源  
秋來未減新詩興世換猶留舊劫痕  
晚臥滄江無限感倘思洗夢更題軒

離海縣雖舊有洗夢  
軒君住持時所居也

繁華回首易成灰且向河山酹一杯  
玉宇高寒人盡望銅琶悲壯客誰來  
萬間恨少逃亡屋千尺愁看鬪體臺  
獨有杜陵詩作史依



然身臥故書堆

丁丑冬月過濠鏡與覺公同遊蓮峯普濟諸禪院並過盧氏

園

寥落羈懷強自寬故人相見雜悲歡  
兵塵蒼莽今何世鄉夢迷離歲易殘

禪院重尋翰墨緣不隨歷劫散雲煙  
誰知野老吞聲恨怕說滄桑獨黯然

金谷荒涼十畝園吳梁宿草不堪論  
永嘉又續流人錄海外桃花尚有村

烽煙滿地怨流離猶得從容共一卮  
他日更尋雞黍約莫愁蹤跡隔天涯

虛公避地大良寄示近作依韻奉和

卅年閱盡滄桑劫愁絕茫茫去日長  
何事杜鵑勸歸去亂雲遮斷

越王鄉

風雷隱隱玉淵龍況是元黃野戰中誰似華陽老道士空山深處睡方濃

玉京迢遞夢難尋歌哭無端共此心我亦當年杜清碧喜聞空谷有登音

青羊洞古話前因合與名山作主人倘許蒲團分一席乞天留伴

歲寒身

鳳城青羊洞爲縣  
學分院舉君住持

論道答酥醪道侶

大道無藩籬妙契在元元往讀柱下書紬繹五千言諸家互箋注  
枝葉何太繁那怪下士笑難與俗人論末流更紛歧爐鼎多旁門  
或云水火濟或謂龍虎馴三神守寂滅一炁調氤氲南北遞流行  
異派豈同源神淵珠孰得闢室籛徒捫我思稚川子修養洞本原  
著書內外篇體備用亦存北庵一瓣香至今道常尊緬懷列仙侶

高揖唐軒轅長春勸止殺片語回春溫超世似獨善愛物豈少恩  
廼知龍門史刑名儼不倫故山倘歸去翛然絕塵喧坐見橫流亟  
此亦桃花村

題黃少強畫達摩像

枯坐頽然面壁僧西來佛法有傳燈不須解說煩文字已悟人天  
最上乘

少強爲余寫真口占奉謝

七十六年如夢影空山慚說歲寒身煩君善繪流民手爲我衰顏  
一寫真

伯魯寄示新詩並以玉桂見贈步韵賦謝

滄桑萬變今何世漂泊同爲浮海人雲樹相望蹤未隔風萍偶合  
意逾親長吟不盡蒼茫感多病真愁偃蹇身珍藥見貽期起廢只  
愁躑躅困風塵



將之澳門留別同人

匆匆襤被促征輪蓬轉依然海外身  
漂泊江湖蹤易散亂離朋舊意逾親  
休論松菊荒三徑尙喜桃花別一津  
帶水相望長不隔未應空谷絕音塵

留別居停了因道長

杜陵廣廈能相庇王粲登樓強自寬  
南海蠶它今世渺東京廚顧古人難  
萍蓬迭轉無歸計鷗鷺重招拾墜歡  
兵氣銷沈終有日卑棲互祝一枝安

題顧橫波夫人畫蘭卷子

才華一代管夫人空谷幽蘭自寫真  
寒夜擁爐多韻事不隨馬下怨風塵

畫家精鑒小羅浮題詠當年盡勝流  
劫後居然雙璧合美人名士

並千秋

卷爲馮魚山舊藏吳綾人董小松皆有題詠同時魚山復爲小松畫扇今并歸鍾君仁陽合裝一卷

題張仲球因樹園圖

昌黎庭樹淵明柳手植辛勤愛此廬  
難得天然留勝境百年喬木自成圖

池亭小築繞紅欄芳草芊芊拓地寬  
不種桃花亦真隱旁人只作武陵看

綠陰深處護人家汲得新泉共煮茶  
猶有竹籬茅舍意底須金谷鬪豪華

林泉瀟灑畫中身一卷楞嚴悟宿因  
花雨香飄清淨界不知桑海幾揚塵

題盧煊仲娛園雅集圖

昔聞珠江盛行樂海山萬松盡零落  
一時歌舞起樓臺幾日歸來怨城郭  
何如遠避人境喧世外卻有桃花源  
此地不受烽煙厄靈光獨歸常能存  
主人岡州舊名閥築園奉母陔華潔  
機雲分住屋

西東春草堂開娛歲月拓地十畝勞經營審曲面勢不肯平廻欄  
幾折愈幽邃奇石萬態何崢嶸中有一亭翼然出俯仰足使塵襟  
豁樹色山光潤欲流綠意紅情芳未歇每逢勝日賓筵開置身恍  
自金谷來曾記中秋共談讌芳池華月光徘徊世事十年如轉燭  
黃壚重過山河邈局外看棋劫太多花前聯袂歡誰續且喜齊名  
有季方白頭相見談滄桑題詩尙憶西池夢愛客頻傾北海觴  
來朋舊紛如雨永嘉況值流人聚爭傳佳話會耆英更寫閒情圖  
客主把卷賞會境疑仙倘容終隱耽林泉畫意詩心託深窈鷁巢  
蛟石長流傳

己卯正月十三日偕覺公蓮峯寺禮佛

平生志皈依舊侶今無幾凌晨訪招提瓣香虔展禮寶相現莊嚴  
琳宮瞻尺咫象教被尙遠龍華會能紀稽首蓮臺前神馳馬鬣水  
佛火一燈明普照億萬里上方鐘磬微誰喚衆生起願求法雨施



盡使兵塵洗金石堅素心風霜憐暮齒避人逃空虛登音差可喜  
和錢二南

今昨從誰問是非眼中漸覺故人稀怯風幕燕猶爭戀响沫池魚  
卻互依滄海掀波殘劫亟雲山懸夢夙心違飄零我亦江南客芳  
草天涯愁未歸

題姚粟若畫爲盧煊仲

淋漓大幅似荆關不寫江南一片山懸向高堂風雨起長留絕筆  
在人間

海外飄零老鄭虔八哀愁詠杜陵篇酒酣潑墨成陳迹爲補林巒

一惘然

粟若畫未完煊卒  
煊仲信友補成之

庚辰長至值先太夫人諱日淒然有述

蓼莪哀動廢詩人淚漬天涯草不春四十年來遊子恨誰知佳節  
是蕭辰

題張純初百花卷

點綴韶光盡有情  
紛紛紅紫未知名  
憑君爲注羣芳譜  
更與徐黃鬪寫生

羅浮仙客歲寒身  
託意芳菲着色新  
二十四番花信換  
隔山畫派有傳人

題劉翰怡 崇陵補樹圖

景皇御宇三十載  
宵旰憂勤史能紀  
一朝弓劍泣橋山  
眼枯又見桑生海  
獨有孤臣種樹廬  
冠帶扶鋤空谷裏  
苦戀寒枝冰雪深  
養成直幹風雲起  
年年摧剝漸凋疏  
白衣陵下增歡歎  
栽培豈不賴後人  
嘉業堂高世稱美  
勉殫臣力敢辭劬  
得藉天功斯可恃  
鬱葱佳氣故依然  
定知呵護神靈在  
且看青翠干霄漢  
絢爛奎章拜丹宸  
愧我空懷捧土心  
昔歎滯留今暮齒  
披圖猶見枝條茂  
劫餘忍說山河改  
千秋遺恨到冬青  
賸欲蒼茫訴真宰  
媯皇鍊石

事何奇重整金甌亦如此

游泮周甲南屏了因贈詩賦荅

彈指星霜換餘生作幸民枯葵猶戀日衰柳總辜春世已輕逢掖  
吾方待飾巾承平談故事不到采薇人

湖海棲遲久元龍氣不豪霜痕欺皂帽草色冷青袍鄒魯儒風遠  
羅浮客夢勞感君相拂拭虛谷倘容逃

區季愷贈詩賦荅

故國飄零百事非舊人還似曙星微儒冠落拓成何用憂樂平生  
願已違

菜根風味耐冰霜枉說當年博士羊尙有詩書空束閣更無袍笏  
可登場

刻畫嫫鹽枉自工欲持羅綺爲誰容淒涼擁髻樊通德翠袖紅燈  
不再逢



得丹石書感賦

八方霧霧竟同昏欲訴煩冤叩帝閭曾是草茅猶戀闕獨憐節度  
尙開門宮花寂寞成殘夢篋扇低徊感舊恩往事思量倍惆悵貞  
元朝士幾人存

答江霞公用原韻

蒼茫海氣日昏昏夢入沉冥隔九閭頭白幾人還故國眼枯何處  
望修門江桑易落長留恨社櫟能全總負恩輸與文通五色筆他  
年猶有谷音存

再疊前韻

兵塵莽莽百城昏太息誰能獨守閨扣角有人歌白石種瓜無地  
隱青門衰年怕說桑榆景倦客慚叨菜把恩已分此身漂泊慣未  
容高論舌空存

游泮周甲蒙 賞泮林模楷扁額恭賦

壺粥生涯舊夢悽白頭博士是周黎故人知我逃名久捧出天

書賜品題

商雲汀金芝軒二君  
上達蒙御書之賜

簪花逐隊少年場彈指匆匆六十霜愁絕義熙題甲子淒涼歲月  
半滄桑

太學游談隱患深百年士氣轉銷沉東京模楷思元禮自揣平生  
愧不禁

泮宮重賦始袁錢遙溯乾隆極盛年衰朽自憐生已晚未酬塵露

拜

恩偏

乾隆時袁倉山錢嶼沙重遊泮水有唱和  
詩遂成故事御書之賜前此所未有也

歸里後窗外梅花盛開詩以賞之成五絕句

不是孤山處士家居然春色占繁華白頭歸後重相見愁絕年時  
負此花

一樹亭亭獨倚空廿年鋤月傍牆東自慚八十支離叟錯認詩人  
陸放翁

蘿洞探春幾度忙舊遊回首感蒼茫老來只索簷前笑留與詞人賦暗香

瓊瑤萬片欲貽誰尚有鄰翁乞一枝莫道折來傷歲暮羅浮編袂夢回時

纔從野徑恣幽尋瞥眼驚看滿故林世自亂離花自好可知來復見天心

霞公過澳贈詩依韻奉荅

年時烽火斷音書愁向靈均問卜居自笑黃冠原是客相看白首愧爲儒夢回莫怪蹤迷鹿响沫甯堪隊逐魚已分卑棲妨未穩枝頭容得抱香無

再疊前韻贈霞公

久辦黃紬讀道書怕聞鐘鼓祀爰居楚狂未肯隨流俗鄭緩從知是小儒照影水中甯見蟹忘機濠上且觀魚自憐名姓甘埋沒悟



得真空一字無

霞公寄詩見贈和作

海鷗怪我未能馴坐閱滄塵物外身萬事早知泡影幻百年難問  
去來因欲回世劫愁無佛忍墮泥塗恐不神最憶故園松菊在白  
頭猶是義熙民

霞公自島歸市樓小集賦贈並賀其重遊泮水

舊遊休更憶蓬萊泮壁荒涼感劫灰白髮能談前代事青衫重見  
故人來風塵閱盡餘詩卷烽火生還共酒杯留得歲寒覘晚節山  
中鵲鶴莫相猜

二南以除夕詩見示依韻奉荅

舊約東風似有情茗華忍便說無生已知歷盡繩難續要挽波迴  
鏡共平景物當前聊可翫屠蘇最後不辭傾童時樂事甯能再慚  
負墻隅二尺檠

飽閱滄波眼尙明歸舟空羨去帆輕微暄春色催花信將盡年光  
聽漏聲漢臘臣家猶世守吳天詩老正吟成

張傳老在廬以除夕詩見華甲子兩周今日書空軒家歲歲與天光南山除夕詩也

逢人莫道癡能賣獨有癡心望太平

### 十三日晨起蓮峯寺禮佛

開歲條經旬春光正和煦寒燠忽異候作勢挾風雨朔改節未更

今歲新舊歷同日祝報  
敦甫芝軒以函來約

盛會想重舉晨起謁招提有若趨官府朝天夢已虛

野老心逾苦只此一瓣香瞻禮肅琳宇自抒螻蟻忱那記鷓鴣序  
老僧似相識怪我獨行踣問訊逢路人孤懷誰可語空谷有同音  
卻憶水雲侶化鶴逾五年流塵黯如許咫尺邈山河徘徊意悽楚  
餘生亦何爲沈沈困羈羽波雲百謫詭身世一  
仰俯尙祝太平年拜颺尙再覩

五年前與覺公同禮佛寺鄭鏡湖  
庄覺公今寄居於此重過凄然

### 客感六十韻

湖海飄零地干戈擾攘時百年身及髦十口迹猶羈憶自兵塵起

頻占歲晷移蒼黃鶯信斷赤白羽書馳梁燕初辭幕巢鳥未有枝

江關他日淚厨顧古人期王粲樓容倚周瑜宅肯推中原方黥黷

異地且棲遲

戰事初起避兵香港假館於黃君梓林

客久勞三徙天空別一涯素心欣把袂白

髮各添絲風雨淒如晦山河邈莫追

移家澳門赴汪覺公約覺公尋化去

烽煙瀨海急雲樹

故鄉思聞道雷霆下曾無壁壘支遂夷秦郡縣遽易漢旌旗殃仁

池魚及機先野鳥知逃亡千室盡奔走萬夫疲落魄衣冠賤驚魂

草木疑但能全性命敢復怨流離

廣州不守居民走避一空

仗節無蘇武登場有偃

師狐威從可假狙衆易爲欺亦謂謀生聚其如苦挾持搜牢嚴法

令窘辱甚鞭笞往往叢民怨紛紛祇敵資

東人設省政府

觸蠻酣互鬪螳雀

巧相窺冷眼看成敗回頭感盛衰破家憐島客失路泣湘纍飛電

頻傳警驚飈不斷吹

香港失後僑民星散

蛟涎還肆毒虎口竟瀕危幸脫磨牙噬

能忘舐犢私暫歸常禁足欲語敢伸眉

兒子樹芝被留尋得釋

阮舍俄悲鵬佗城

况集鴟門單傷骨肉世難痛瘡痍

八姪幼庵由港歸省一病不起

喬木室多毀荒榛路更



歧罄懸人坐困壘斷市居奇鹿銚甯忘險蠅營尙競錐中枯愁吸

髓外飾笑蒙皮

百物奇品市人操縱外繁盛而中實艱窘

共有勞薪數徒令數米炊萬錢艱一飽

半菽耐長飢久矣詩書廢公然盜賊爲窮途生意絕荒塚死灰遺

食糧饑制人多不飽郊外發塚之禍尤烈

鄭俠圖難繪春陵語太悲斯民已塗炭吾道豈磷縮空

倚天邊劍愁看劫後基徘徊中澤羽躑躅觸藩羸轍迹重驅憤歌

聲又聽驪絕憐求稻苦莫笑搶榆卑

留者數月仍返國樹芝蘭食桂林

旅泊隨瀕鳥歸期

負子規幾經滄海夢卻愧歲寒姿乞食滯明詠卜居正則詞髮晞

籠皂帽身隱託黃純一代遺民恨千秋痛史垂籌鳴陰作祟竿揭

戲同兒太息誰階厲相從盡變夷機心因召禍戰血遂成厯忍道

天真醉翻言衆可犧私憂胸積塊孤憤口銜碑

革命之禍用夷變夏今夷亦有相殘殺雖生屬國更無公議

故

國魂長戀移山願亦癡書空頻自詫作計欲安之倘悟莊爲蝶何

嫌老守雌浮沈聊玩世寂寞強裁詩

自題一絕

世事兼身事墨痕和淚痕十年羈客感付與後人論

避兵澳門今七年矣將爲歸計以屋轉售於人感而有作

枉說桃源別有津一椽聊託劫餘身卜居詎爲窮年計比屋都非

舊日鄰

東西鄰屋往與澹庵支軒同時所購今二十年皆已易主

陳迹低徊鴻爪雪旅懷長觸燕梁塵誠知

傳舍吾何憾愁望鄉關暗愴神

八十生辰蒙 賞永綏吉劭扁額恭賦

白首孤臣久負 恩餘生空是戀修門詩賡芹藻方滋愧

去歲游洋周甲蒙當洋林模楷

額易景迫桑榆那復論劫後衣冠愁氣盡天邊綸綍沐春溫

宸章

稠疊誠非分唯有移山志尙存

癸未元月十三日陳禮部念典宅公宴同集者桂坊區大原

金湛霖潘元燿

朔改年更百事非白頭無分理朝衣玉堦列仗魂長繞金鑑陳書  
願已違鵷首未回天帝醉鵷行重認舊人稀餘生尙有爭王夢不

賦旄邱怨式微

東許魯山

金焦回望最關情  
丁卯橋邊舊有名  
故國淒涼鄉社夢  
空山寥落歲寒盟  
隨風萍跡終難合  
向日葵心卻共傾  
兩度拜恩慚附驥

余與君同以八十生辰重遊泮水兩拜御書之賜又同爲升徙人

與君留命頌河清

歸里半年索居鬱鬱清明掃墓後感賦

王官無地賦三休  
身世飄如不繫舟  
久客自憐萍梗泛  
乍歸猶困稻粱謀  
忘機笑我儕鷗鷺  
隨俗憑人喚馬牛  
衰朽未須文誓墓  
白頭忍淚拜松楸

重到澳門陶社諸君以詩見贈賦荅用原韻

頻年倦旅欲歸休  
又理輕裝上客舟  
形役勞勞身是累  
生涯落落拙於謀  
澤中已見悲羣雁  
劫後誰能挽萬牛  
待續九歌哀故國  
蒼茫何處望長楸



再疊前韻荅錢二南

身世悠悠百慮休  
浮生悟徹一虛舟  
鬢絲此日仍爲客  
肉食何人可共謀  
入夢易迷莊叟蝶  
求芻方笑景升牛  
早知落拓儒冠誤  
歸種江淮千樹楸

題靈洲訪古圖

昔年泛舟石門  
遂登靈洲東坡詩所謂妙高臺也甫數月而避兵浮海不復記憶同遊客盧子樞製爲斯圖出以相示爲題四絕句

千年勝蹟古靈洲  
白髮同來憶舊遊  
我比東坡增感慨  
烽煙徧地使人愁

孤松偃蹇臥當門  
佛法傳衣喜尙存  
爲訪殘碑嵌四壁  
有人愛惜到苔痕

空山寂寞歲駸駸  
往事如煙不可尋  
賴有荆關留畫稿  
披圖重與

記題襟

海外棲遲近十年歸來人世感推遷水雲老去憶河遠重話遊蹤

一惘然

同遊有江覺公季孔覺公化去三年孔曼儒寓順德亦久不相見矣

題黃忠端草書詩卷

晚明一代論忠義漳浦叢山兩大儒長使人間留正氣要知文陸本程朱

三疏錚錚氣未馴醉餘題墨見嶙峋誰云道學多庸腐餘事文章亦絕倫

翰墨從來自有靈故家蹄躐幾飄零却餘神物能重見百本猶思誦孝經

伯魯寄示近作奉答三絕句

年時歸計總踟躕海外飄零故侶疏同是居夷成倦客羨君却後尚收書

輕裝歸去近重陽瞥眼黃花又一場無復登高同作興勝遊翻不似他鄉

自憐來去太匆匆蹤跡依然似斷蓬帶水相望終不隔幾回天際數歸鴻

豫荃寄示九日詩依韻奉和

老圃黃花句獨工自將晚節慰羈窮憑高未免離人恨抱獨猶希處士風世事推排塵劫後鄉心繾綣夢魂中年來何限停雲感白髮相望八十翁

夕陽城郭百愁生雄視何人塑尙橫冷笑鼠狐紛自據劇憐蠻觸苦相爭河山殊異秋多感風雨淒涼夜有聲不把茱萸吾亦醉輸

公剪水寫詩情

君詩五嶺夢回煙樹外半淞波剪畫圖中佳句也

豫荃寄詩依韻奉和並柬一山

大地龍潛黯伏辰海濱投老舊詞臣谷音唱和遙相應同是西臺



痛哭人

回首金門注籍年看花有客着鞭先曲園第二誰能記夢隔蓬山路幾千

金曲園八十時有印章海內翰林第二其時州伍萬生第一金是家忘音問隔絕不知年星最高為曲園第二又為誰也

明潢雅琴拓本矩庵所藏為陳伯任題

潢南雅樂未銷沈曾向朱門拂素琴幾度歌殘桑海換卻從異代得知音

海雪孤懷綠綺臺翁山故國不勝哀焦桐豈是無情物幸未人間墮劫灰

初度日陶社諸公招集因樹園賦謝

楚客降庚寅絳老書亥字昔人值初度紀算增一歲相沿互解觴

未解祝延意禮失或在夷翻訝西俗異

東蘇與人論祝壽書古以生日為增一歲故互相稱

何時

滄桑逾卅年尚有周黎在若援革除例中壽未及艾

昔有蘇生言見制甲子不應復計見紀文

連筆記方望溪文中子以前有庚甲子以後無庚新制甲子正不應計年

自憐草間活餘生固已贅黍谷景不暄萍海蹤

如寄本非金石姿坐閱波雲態天意復蒼茫遷流今何世倒懸禍  
方亟抵死爭猶熾亭林抱隱痛檀河深憤慨投老欲安歸疑年誰  
續記卻逢汝社朋賓筵敞高會牛心詎可炙豬肝亦爲累物力感  
艱難捫腹滋負愧且莫念百年徑須謀一醉萬松向人青俯仰歡  
未墜

蕭壽民席上食薇歸而有作

日夕望松山不識山中薇想像嶽崎人抱節耐長飢小草亦何幸  
千載有光輝瞿然念身世芳躅誰能追南方狀草木眼底紛陸離  
空谷閱孤秀寒歲留幽姿合寫高士圖未許流俗知在山何必深  
素質自芳菲海濱述風土記載亦偶遺當筵佐盤餐莫笑口腹私  
庾郎足鮭菜吳客憶蓴絲

薇菜煎非同  
羹味滑似蓴

風味畧相似肉食彼何爲渙浥

尚偷生野老只自悲岩岩首陽顛世晚吾安歸

陳伯任以近作見示題二絕句

危欄袖手此何年一度淒吟一悵然  
世外桃源休更說谷音留與  
後人傳

珠海驚波已慣聞暫歸無計慰離羣  
老來同輩傷寥落青眼高歌  
喜有君

昔與西昌諸公遊北海  
外興共將以快詩也可喜也

再題伯任詩卷

籌筆年時百感侵每從餘暇耐清吟  
平生閱盡忙閑境長抱蒼茫  
一片心

一篇博麗似梅村少日才名已絕倫  
難得江山助據發西冷風月  
屬詞人

感亂傷離此一時銷磨豪氣細論詩  
卻教詩境隨年進豁徑深沈  
合自知

填胸塊壘未能平怕聽人間變徵聲  
眼底兵塵終掃盡待君重與  
頌河清



題楊芝泉侍親尋山圖

郭璞著葬經流傳書最古疑龍及撼龍其義各有取本無求福心  
詎爲俗說蠱楊侯性純孝養志瞻岵岵百年會有限淚盡一抔土  
永慕感霜露登陟歷寒暑牛眠豈在遠俗目若無覩劃然天宇開  
葱鬱佳氣聚山川信有靈藉慰孝思苦童稚昔追隨頭白今如許  
展覲禮承先披圖德述祖餘蔭逮雲初千年護封樹

題俞倬雲行樂圖

風景山河感異殊要從故我認今吾本來面目猶能識獨立精神  
祇自娛宿悟倘同靈運慧舊遊可有少文圖知君解說三乘法博  
得拈花一笑無

丙戌正月十三日大佛寺禮佛芝軒客南京亦在永慶萬壽  
寺展禮寄詩索和依韻答之

故宮殘劫恨難支低首長旛獻佛時膜拜自憐筋力倦皈依猶與

夢魂期辦香默祝情彌芳  
鐘臺誰從望亦凝尚有同音相應和書  
空咄咄兩心知

戊子歲朝

倏見年光換衰遲耐索居身閒常檢藥  
眼澀懶看書憂在鐵寒外  
生經喪亂餘早知天已墜杞叟計全疏  
暫息風塵跡猶留劫火灰歸來長寂寞  
老去更摧頽世難何曾定  
天心不可回青山吾已辦荷揜幾時來

題溥心畬西山偕隱圖

高情陶翟出天家逝水華年怨落花  
夢繞西山冰雪冷更無十畝  
故侯瓜

再爲心畬題花王堂坐雨圖

已是芳菲欲盡時關情原在最高枝  
莫愁風雨飄搖甚自有天然

獨秀姿

鄉舉重逢一山翰怡寄詩見贈賦答

早歲甯知世運遷可憐留命待桑田子餘自愧偷生日劫後重逢  
得舉年籠燭篋中惟有淚看花眼底已成煙白頭愁說承平事悲  
詫無緣更問天

題黃了因周卓凡松陰並坐圖

早共燈窗六十年恒河照影感華顛便從汝社重回首倘到洪厓  
共拍肩高致不嫌松偃蹇閒情相對鶴蹠躔畫圖寫出雷陳契香  
火於今悟宿緣

闇齋詩稿一卷訖



謝齋詞

番禺張學華

金縷曲

乙巳重赴都門辛伯以詞送行和答

又逐征塵去記年時看花載酒清遊幾度未有萬言投魏闕空負  
故人期許但愁倚孤舟風雨鳳泊鸞漂身世感望天邊雲樹添離  
緒千里外相思苦幾年不到長安路最難忘驚心烽火蒼黃日  
暮朝議紛紜空復爾錯論北門誰付問孰是危時砥柱他日東華  
談掌錄怕春明舊夢無尋處桑海幻爲君語

原作

摸魚子

汪兆銓

黯連朝滿城風雨匆匆送君東去海潮浩渺煙燈暗應有水  
華新賦君且住君莫忘越臺飛雀橋前語京華舊侶試問訊  
頻年金迷紙醉還憶故人否塵世事怕問南飛雁羽隔江

猶自歌舞朝陽今日須鳴鳳待子高騫霜府君聽取君莫學  
曲江祇自饒風度離懷幾許算哀樂中年送人作客最是此  
情苦

滿庭芳

落花和劉伯端

落日啼鵲荒煙怨蜨年時瘦損朱顏園林無主芳信爲誰攀莫問  
春歸何處黃昏後獨倚危欄飄零慣桃花流水翻覺此心閒重  
來歌舞地痕留褪粉夢渺鳴環乍梨雲欲黯蘭露空餐便作天涯  
飛絮娉婷影羞向人間休惆悵亂紅如許茵溷一般看

百字令

丙辰正月十二日妙高臺玩月用山谷韻

看燈節近正月華如水春波搖綠放眼海天同一色俯仰快然意  
足舊夢偎紅

少筠以舊作  
體辭詩出示

新詞刻翠咳唾成珠玉閒愁閣起與君共泛

芳醪 憐伊風露宵深素娥倩影伴庭前花木一樣清光千里共  
試問天心誰屬橫槊當年吹笙何處莫唱南飛曲時值南飛曲  
疏狂容  
我樓頭醉倚橫竹

山亭宴

和黎季裴用張子野韻

畫樓一片喧簫鼓送流光暗移琴柱芳景逐人妍釀花氣風輕霧  
煦客中春思倍纏綿更莫問春來何處勝日共流連憶舊約斜川  
路暮雲不隔天邊樹放明月照人庭宇花信幾番風怕吹起香  
塵暗雨盡歡今夕更何辭喜海外故人重聚酒罷倚闌干卻憶長  
安否

西子妝

春晚和季裴伯端用玉田韻

芍藥煙籠葡萄水皺黯黯一春芳意金尊銀燭晚風前向離人滿



殘清淚愁紅怨碧漸銷盡當年豪氣驀驚心又落花飛絮誰能堪  
此垂楊外燕頤鶯顏鎮日房櫳閉歡塵振觸總成愁但多情莫  
生斯世危樓怕倚春歸矣還能幾醉任飄零流盡滄波萬里

滿庭芳

壽李樹人

丙榮

并題其西湖載酒圖

蘇米風流齊梁煙月婆娑今有詞仙著書人老生及中興年

君壬戌生  
爲同治元

年

歸去青山偕隱塵世事幾換桑田花朝近鶯歌蜨舞恰襯綵衣

翩故鄉吾別久金焦浮翠回首依然羨吟身長健占領江天畫  
出湖山一角呼鷗鶯共語尊前扁舟遠鷗夷心事春在水雲邊

浪淘沙

癸酉餞春和汪覺公

婪尾一樽開游屐重來故山愁聽杜鵑哀撩亂林亭斜日影門掩  
蒼苔鶯燕語相催欲去徘徊東風有約夢中猜分付玉關楊柳

色留待春回

金縷曲

和辛白

萬事浮漚過問人間蘭因絮果爲誰重作莫笑豐干饒舌者待把  
機關說破便欲借禪床趺坐解悟虛空無坐處任楞嚴堆案都無  
那文字障且休墮千塵萬劫風輪簸只禪門本無垢淨佛衣誰  
浣划子須撐何處去救出衆生湯火算顆粟藏身已大七寶莊嚴  
彈指現笑拈花幻相空人我言下悟衆皆和

疏影

見寒鴉作和季裴

寒林古驛有暝鴉萬點驚起羈客雲黯煙淒漸入昏黃年光又換  
陳迹南枝已是無棲處更望斷霜天消息趁夕陽掠影歸來未改  
那時顏色猶記春明故事舊巢零落盡殘夢難續莫上城頭舉

目都非獨自愴懷今昔平蕪一片傷心賦待認取墨痕狼藉怕白頭重聽烏啼幾陣晚風蕭瑟

南浦

送仙蜨還羅浮

羅浮仙侶抱香魂來住水雲家幾日粉衣輕展五色燦朝霞道是

葛翁遣送詫靈蹤肯向俗人誇

羅浮道士言一老人送蜨爾到山蹤跡甚奇

但瑤臺棲慣暫時游

戲芳思託天涯

一霎翩然歸去恣迴翔洞口四時花記伴梵經

詩卷藤架綠陰遮幻影何人剪紙再相逢物化悟南華

仙蜨去後有紙蜨挂牆壁間尋亦不見

賸滕王畫本綺情還入夢中賒

掃花遊

題龍榆生受硯圖

井桐晝暝有一片雲腴白頭親付玉蜨淚注是詞仙點筆製贛洲  
譜絕業空山省識傳衣意苦黯風雨但天外夢沈歌哭何處孤



抱誰可語。勝碧血留痕。萬言曾疏。滄江歲暮。漸浮海。社散。愴懷啼  
字。寫入丹青。合是聲家掌故。試凝佇。看凄迷。畫中煙樹。

石湖仙

市樓小集望海珠木棉同六未霞龔詞博

天涯萍聚。三遊倦歸來。重挈詞侶。烽火正燭天。向尊前。歌翻絳樹。  
亭臺非昔。勝十丈霞城。標舉巖壑。有海桑舊夢。同感。千年霸才。  
頓盡問何時。赤燭一怒。北勝南強。祇是等閒。花譜正色。長留倚天。  
撐拄。那驚塵土。吟望苦春光。卻倩誰主。

蝶戀花

錢二南見示蝴蝶落花圖題詞倚此和之

幾日東風頻換信。倦客重來。踏到驛離徑。喚起花魂添舊恨。一場  
春夢。還還醒。風絮天涯渾不定。金粉飄零。往事無人省。寫入牋  
王新畫本。畫成翻悔留殘影。

金縷曲

伯端以詞寄示適余重到澳門兒輩西行老懷振觸卽用  
其調爲賦一解

己分三休賦儘流連故山後鶴怕吟羈羽倦倚藜床仍作客坐閱  
浮雲如許最難遣離愁千縷身似飄蓬風轉急算人生那得長相  
聚寥落意共誰語西流不斷征帆去鷦鷯心十洲殘劫蒼茫何  
處新燕離巢渾未慣莫向東風輕訴祇悵望天邊雲樹白髮江湖  
吾老矣問扁舟底是桃源路歸及早獨凝佇

尾犯

詠白菊和六禾

何限海桑悲遺世此花依舊清絕莫怨西風甚緇塵能湮拋綺夢  
冰心耐冷殿秋光霜華比潔待思簪髻攬鏡還羞珍護莫輕折  
平生交愛淡歲寒伴合與盟結舊譜銷沈訝芳叢堆雪漫裝點金

天顏色傍東籬猶撐傲骨讓他紅紫又一片芳菲時節

齊天樂

再詠白菊和六禾用原調

孤山合作梅花主寒泉薦階秋菊玉女粧成金仙解脫疑是芳蹤  
相續新醪乍熟恰送酒人來冷香盈掬雪飄蘼倚籬東肯伴幽  
獨人間緇素莫問怕西風起處輕汚塵俗夢入秋清香留晚淡  
羞學逢時粧束霜叢一簇笑異種紛紛近時制得者日午轉  
如雪猶如花所不覺也總輪高獨轉  
綠回黃又滄桑幾局

高陽臺

曩歲和伯端落花詞二十餘年矣頃伯端復以落花詞索  
和感傷時事唯有悲憤爲填一闋

瓊苑妝妍金鈴護穩常時占領春光逝水華年誰知幾度滄桑杜  
鵲空谷留殘劫訴煩冤難問東皇更休論墮溷飄茵一樣荒涼



傷春費盡冬郎淚但香銷夢冷何地尋芳去逐飛蓬關山萬里途  
長天花散後無歸處况人間敢怨風狂最堪憐故蜨吟猶戀斜  
陽

聞齋詞訖



